

漢

書

疏

證

漢書疏證卷三十五

吳 沈欽韓撰

西南夷兩粵朝鮮傳

楚威王時

華陽國志作頃襄王與秦取楚黔中郡事較合

詳古今人表

方三百里

一統志滇池在雲南府昆明縣南呈貢縣西晉益州西

北昆陽州北

略通五尺道

冊說石門山在敘州府慶符縣南五里卽古石門道也

北至葉榆

雲南通志漢葉榆縣在今大理府治東桐師漢志作同並蓋隸體相似在曲靖府霑益州北

此皆巴蜀西南外蠻夷也

宋史蠻夷傳夜郎今涪州之西溱播珍等州是也滇今姚州善闡之地是也邛都雋州會同州與吐蕃接今邛部州蠻所居也雋今雋州昆明在黔瀘徼外今西南蕃部所居也徙今雅州嚴道地祚都在黎州南今兩林及野川蠻所居地冉駹今茂州蠻汶山夷地白馬氏今階州汶州蓋羗類也方輿紀要遵義府漢初爲夜郎侯國

夜郎城在桐梓縣東二十里一統志滇池故城在雲南
府晉寧州東邛都廢縣在寧遠府西昌縣東南嶺唐廢
縣在大理府雲龍州南古爲嶺昆明沈黎故城在雅州
府清溪縣東南故西夷苻都國徙陽廢縣在雅州府天
全州東本西夷國後置徙縣晉曰徙陽茂州爲冉駝國
地武都故城在階州成縣西漢白馬氏地

僇僮旄牛

方言南楚罵庸賤謂之田僇或謂之賸注賸丁健兒也
廣韻僇丁壯兒亦醜也然則僇出僮僕故轉而爲賸以
爲庸賤之醜稱也

北周書僚傳每歲命隨近州鎮出兵討之獲其口以充賤隸謂之爲壓僚

焉後有商旅往來者亦資以爲貨公卿逮于民庶之家有獠口者多矣後世蠻口爲奴婢類此北山經狀如牛而四節生毛名曰旄牛

枸醬

嵇含南方草木狀曰蒟醬卽萹芡也生于蕃國者大而紫謂之萹芡生于番禺者小而青謂之蒟子可以調食故謂之醬本草蘇恭曰蔓生葉似王瓜而厚大光澤味辛香實似桑椹而皮黑肉白李時珍綱目謂蒟子蔓生萹芡草生雖同類而非一物然其花實氣味功用則一也廣東新語蒟卽萹也凡食檳榔必以萹葉爲佐其藤名扶留

出番禺城下

水經注鬱水卽夜郎脈水也東逕牂柯郡且蘭縣謂之
牂柯水水廣數里逕鬱林廣鬱縣爲鬱水又云鬱水南
逕廣州南海郡浪水出焉水經云浪水東至南海番禺
縣分爲二其一南入于海注云鬱水分浪南注其一水
南入者鬱川分派逕四會入海也其一卽川東別逕番
禺城下漢書所謂浮牂柯下離津同會番禺蓋乘斯水
而入于越方輿紀要南北二盤江合流入廣西境內謂
之左江志云左江一名南江以在廣西南境也一名鬱
江以潯州府舊爲鬱林郡也一名牂柯江以昔時道通
牂柯郡也江之別出于貴州境內者又有三源其一曰

福祿江一曰都勻江一曰都泥江

名勝志即謂之祥柯江

流經廣

西境內謂之右江左右江合流于廣東境內謂之西江

至廣州府南而入于海

夜郎者臨牂柯江

方輿紀要盤江在貴州境者為北盤江出四川烏撒府

西北五十里

今為貴州大定府之威寧州

東南為之烏撒南九十里

謂之可度河又東南為七星關河折而南經雲南霑益

州界入貴州境經安南衛東又南經永寧州西境普安

州東境盤迴曲折于山箐間陰翳蒙密夏秋多障流經

募役長官司東南而南盤江流合焉

一統志募役長官司在永寧州西

百七十里州
屬安順府 又東南入廣西泗城州境而謂之左江陶
彌云左江卽盤江盤江卽牂柯江也

浮舩牂柯

一統志盤江在貴州安順府永寧州東四十里按鄭旻
曰盤江下流至打罕舟舩始通然迄無行者

叩竹杖

晉載凱之竹譜云竹之堪杖莫尙于筇磔硤不凡狀若
人功豈必蜀壤亦產徐邦一曰扶老名實縣同注云筇
竹高節實中山海經謂之扶竹

從巴祚關入

一統志符關在瀘州合江縣南按刻本作作者誤也

自夔道指牂柯江

一統志夔道故城今敘州府宣賓縣治

鉤町王

明志雲南臨安府古甸町國宜州通海縣東北有漢甸

町廢縣

苴蘭君恐遠行

一統志平越府秦爲且蘭地漢爲牂柯郡侯邑

金城司馬陳立

常璩序志立字少遷

爲連然長不韋令

方輿紀要雲南府安寧州漢益州郡之連然縣一統志
不韋廢縣在永昌府保山縣府志相傳在鳳谿山下
至興國且同亭

方輿紀要遵義府桐梓縣東北有且同亭

南海尉

藝文類聚苗恭十四州記曰秦以公國爲大郡侯伯爲
小郡大郡曰守小郡曰尉

龍川令

元和志龍川故城在循州河源縣東北水路百七十五

里明志惠州府龍川縣南有龍江卽東江上流也

吾欲興兵絕秦新道

廣東新語湟溪陽山涯口皆有秦關清遠滙口亦有之
蓋粵東要害首在西北故秦所置三關皆在連州之境
而趙佗分兵絕秦新道亦在焉佗旣絕新道於仁化北
一百三十里卽今城口築城以壯橫浦於樂昌西南二
里上抵瀧口築城以壯湟溪蓋仁化接壤桂陽樂昌接
壤郴州按明志仁化樂昌二縣俱屬廣東韶州府當時東嶺未開入粵者多
由此二道此佗設險之意也按元和志任囂城在韶州
樂昌縣南五里輿地紀要趙佗城在韶州仁化縣北九

十里城口材昔尉信据粵以五嶺爲界乃築此城以定
粵境

橫浦

通典虔州大庾縣橫浦廢關在此按徐廣云在桂陽通

四會地理志中宿縣有滙浦關水經注溱水過滇陽縣

出滙浦關

今廣州清遠縣本漢中宿縣

徐廣蓋以滙橫字涉而誤以

楊僕出豫章下橫浦云在虔州是一統志秦關在南雄

府保昌縣西北卽橫浦關輿地紀勝云在縣東北四十

里府志又以梅關爲秦關皆非今附考五嶺之地御覽

五十廣州記曰五嶺大庾始安臨賀桂陽揭陽也南康

記曰秦始皇畧定楊越適戍五嶺第一塞上嶺卽南康

大庾嶺是第二騎田嶺今桂陽郡臘嶺是

廣州記第三

都龐嶺今江華郡永明嶺是第四嶺者亦江華郡

卽道州

白芒嶺是第五越嶺卽零陵南臨源嶺是也水經注連

溪山卽大庾嶺五嶺之最東矣故曰東嶠山又來水出

汝成縣東又西黃水注之水出郴縣西黃岑山山則騎

田之嶠五嶺之第二嶺也鍾水出桂陽南平縣都山卽

都龐之嶠五嶺之第三嶺也馮水出于賀郡馮乘縣東

北馮岡

廣西平樂府富川縣東有馮乘故縣

又左合萌渚之水水南出于

萌渚之嶠五嶺之第四嶺也湘水東北過零陵縣越城

嶠水下注湘水越城嶠卽五嶺之西嶺也明志南安府

大庾縣西南有大庾嶺湖南道州江華縣南接廣西賀縣界西

有白芒嶺一名毗渚又永明縣北有永明嶺亦曰都龐

嶺郴州南有黃岑山亦曰騎田嶺其支曰揭嶺疑臘嶺音同而

廣西桂林府興安縣北有越城嶺亦曰始安嶠周去非

嶺外代答云五嶺之說皆指山名今考之乃入嶺之途

五耳非必山也自福建入廣東之稽梅一也自江西之

南安入南雄二也自湖廣之郴入連三也自道州入廣

西之賀縣四也自全入靜江五也按此乃妄說也赤雅臺城

之嶠在大庾騎田之嶠在桂陽都龐之嶠在九真萌渚之嶠在臨賀越城之嶠在始安嶺有五而桂林擅其三

今按諸家所載雖小有差殊于地望大致不爽惟赤雅云都麗在九真者蓋傳本之誤

陽山

元和志陽山故關在連州陽山縣西北四十里茂漢口

今陽山北當騎田嶺路秦於此立關

赤雅按騎田接彬州今名黃箱山或

名黃峇山支峰楚粵分界爲五嶺之一

一統志陽山縣在連州東南二百

里

湟谿關

一統志湟溪關在連州西北

自立爲南粵武王

殷本紀湯曰吾甚武故號曰武王

側室之子

內則妻將生子及月辰居側室鄭云謂夫之室次燕寢
又云庶人無側室者及月辰夫出居羣室鄭云凡子生
皆就側室疏云世子亦就側室按昭二十九年傳公衍
公爲之生其母偕出注云出之產舍是產舍謂之側室
漢時猶然外戚傳班婕妤仔居增成舍再就館所謂陽祿
柘館其產舍也文帝以呂后取它姓子爲帝故特言側
室之子明親高帝子也其非嫡生外國已知不待自表
師古解非也顧亭林云卿置側室趙有側室曰穿此與
小宗伯職正室謂之門子相對又非此義

求親昆弟

爾雅謂之親同姓

服嶺以南

方輿紀要越城嶺在桂林府興安縣北三里五嶺之最西嶺也

上褚中褚下褚

師古解謬也遣人衣服但計精物何論綿之厚薄周禮
厘人注褚藏釋文云本或作貯或作褚襄三十年傳取
我衣冠而褚之注褚畜也呂覽樂成篇作我有衣冠而
子產貯之一切經音義四十一引傳亦爲貯是褚乃貯藏

之義莊子至樂褚小者不可以懷大亦所貯之器也蓋御府所貯衣有上中下三等

蠻夷大長老夫臣佗

曲禮正義崔靈恩云四夷之長稱曰王者又鄭老夫老人稱也亦明君貪賢隋書地理志諸蠻有銅鼓者號爲都老羣情推服尉佗于漢自稱蠻夷大酋長老夫臣故俚人猶呼其所尊爲倒老也

西甌

淮南人間訓有西嘔君譯吁宋此閩粵傳斬西于王卽其國郭璞云閩粵卽西甌非也後漢書馬援傳注西于

縣故城在今交州龍編縣東方輿紀要越王城在北江

府西南東岸縣

一統志作又安府東岸縣二府俱有東岸縣未知孰是

一名螺城

以其屈曲如螺也一統志雒王宮在交州府三帶州雒乃駱之誤耳

其眾半羸

半羸不辭史記作西歐駱裸國羸乃羸字之誤

紫貝

嶺表錄異紫貝卽研螺也僭振夷黎海畔採以爲貨

桂蠹

王會解自深桂大業拾遺錄隋時始安

今桂林府

獻桂蠹四

瓶以蜜漬之紫色辛香有味啖之去痰飲之疾按蘇林
注云赤穀小車者續志云小使車蘭輿赤穀追捕考案
有所勅取者之所乘蓋卽追鋒車取其疾速

生翠四十雙

通典安南都護府貢翠毛二百合按王會解蒼梧翡翠
桂海虞衡志翡翠出海南邕賀二州亦有腊而賣之故
此云生翠

孔雀二雙

鹽鐵論崇禮南越以孔雀珥門戶桂海虞衡志孔雀生高
山喬木之上人採其雛育之喜臥沙中以沙自浴拘拘

其適雄者尾長數尺生三年尾始長歲一脫尾夏秋復生

陸賈還報

御覽

一百九十四

裴淵明廣州記曰尉佗築臺以朔望升拜

號爲朝臺又傍江構起華館以送陸賈因稱朝亭

西京雜記

南粵王獻高帝石蜜五斛蜜燭二百杖白鷗黑鷗各一雙又云積草池中有珊瑚樹高一丈二丈一本三柯上有四百六十二條南越王趙佗所獻號爲烽火樹至夜景常煥然

屯桂陽

今郴州也

使人函封漢使節置塞上

元和志大庾嶺本名塞上廣東新語五嶺皆粵門若臺
關則秦所築故亦曰秦南門始皇紀三十四年論治
獄吏不直者築南越地漢
之北塞至塞門南塞至暑門臺關又暑門之大者以其
山曰臺山故曰臺關

龔侯

史記作龍亢侯表作龍侯蓋脫一字龔又龍亢之并音
灼以爲古字謬也集韻因此文增入又訛爲龔二寫成
訛類然

下滄水

方輿紀要滄水在連州陽山縣東卽滄水也亦曰滄水

自湖廣宜遠縣界東南流入縣境復役而西南入韶州
府英德縣界又南流入廣州府清遠縣東南與潁水合
或下離水或抵蒼梧

方輿紀要灘江出桂林府興安縣海陽山經陽朔縣東
入平樂府界亦名府江自平樂而南經昭平縣西入梧
州界舊志云府江北抵桂林南連梧州上下八百餘里
兩廣舟船必由之路至湖州之西北仍曰桂江亦曰灘
江南連過府城西合于左右二江謂之三江口又東入
廣東封川縣界謂之西江東至番禺入于海

知嘉所之遣人追

廣東新語嘉今有橋在順德南門外名伏波橋當漢兵

于其鄉築石埭金斗二城以爲守敗後伏波
追奔至此編橋度兵旣獲嘉橋遂以伏波名

陷尋陘破石門

索隱姚氏云

陳書姚察傳著漢書訓纂
三十卷皆師古所乾沒

尋陘在始興縣

三百里近連口廣州記石門在番禺縣北二十里元豐

志番禺縣
有石門鎮昔呂嘉積石于江名曰石門按寰宇記樓船

水在南雄州浚昌縣北五十里出大庾嶺之西旁橫流

此有文當云樓船
將軍于此擊南越因名樓船水輿地廣記大庾嶺淨水

所出龍川界西逕浚陽南右注潦水楊僕下橫浦卽此

淨水矣則尋陘在番禺之北也廣東新語自英德至清

遠有三峽

明志英德韶州府屬縣漢滇陽也清遠屬廣州府本中宿縣地

一曰中宿一

曰大廟一曰滇陽大廟介二峽之間尤險隘故尉佗築

萬人城于此漢楊僕先陷尋陜卽此石埭在順德西南

二十里

順德屬廣州府乾隆志云東北至府一百里

呂嘉亡入海伏波將軍

路博德追至石埭得

姓騶氏

何焯曰史記注徐廣云騶一作駱甌駱之名其以此歟

按廣韻駱姓出東陽作駱者是

都冶

所都之地後爲冶縣通典福州武帝時閩越反滅之徙

其人于江淮間盡虛其地後有逃遁山谷者頗出立爲
治縣也

都東甌

元和志東甌今温州永嘉縣是也後以甌地爲回浦縣

永嘉縣卽漢回浦縣之東甌鄉

明志永寧江在温州府城北一名甌江自蒼括

諸溪滙流入郡界東注于海

方輿紀要東甌城在建寧府東南十里

一統志作百餘里

兵至揭陽

揭陽潮州也元和志潮州西南至廣州水陸路相兼一

千六百里大海在潮州海陽縣東南一百三十步

明志海陽

縣南濱海有魚水門又揭陽縣西北有揭嶺東南濱海

豫章梅嶺

通典梅嶺卽今虔州虔化縣界明志南雄府保昌縣東有小庾嶺輿地紀勝大庾嶺去保昌縣八十里廣東新語梅嶺之名以梅銷始銷家于臺嶺越重銷之賢因稱是嶺曰梅嶺銷本越勾踐子孫與其君常避楚走丹陽舉鄉更姓梅因名舉鄉曰梅里秦并六國越復稱王自舉鄉踰零陵至于南海從之築城澗水上奉其王居之其曰大庾嶺者漢元鼎五年楊僕出豫章擊南裨將庾勝城而戍之故名大庾其東四十里勝弟所守名小庾

入白砂武林

寰宇記白沙在饒州鄱陽縣西水路一百二十里沙白如雪因以爲名又武林山在餘干縣東北三十里臨大湖漢書作武林劉禹錫集答饒州元使君書餘干有畝鍾之地武林有干章之材

明志鄱陽縣東南有地名武林所謂白沙武林也

出句章

明志益波府慈谿縣西南有古句章城

出如邪白沙

輿地廣記筠州上高縣有斜口水源出瑞州府上高縣蒙山又新昌縣西有鹽溪一名若耶溪當是此如邪也索隱以爲越州之若耶溪風馬牛不相及矣

語兒侯

越絕女陽亭者句踐入宦于吳夫人從道產女此亭養
于李鄉句踐勝吳更名女陽更就李爲語兒鄉

反攻粵軍於漢陽

方輿紀要漢陽城在建寧府浦城縣北志云今縣城亦
漢東越王餘善創築後廢唐爲浦城縣

朝鮮王滿

皇明象胥錄其號朝鮮以日東出鮮潤或云境有汕水
故明魏志朝鮮王准爲燕亡人衛滿所攻奪將其左右
宮人走入海

都王險

隋書高麗傳都于平壤城亦曰長安城東西六里隨山

屈曲南臨沮水

新唐書平壤在鴨綠水東南

朝鮮國志平安道治平

壤府東南去王京五百餘里杜佑曰平壤卽王險城也

至沮水爲界

方輿紀要大通江在平壤城東亦曰大同江舊名沮水

從齊浮勃海

于欽齊乘北自平州碣石南至登州沙門島是勃海之口濶五百餘里方輿紀要海在幽平間者皆謂之溟渤東西浩瀚千有餘里薛季宣曰河入海處舊在平州石

城縣東望碣石其後大風逆河皆漸于海舊道堙矣程大昌曰逆河世之所謂渤海者也

左將軍卒多

史記作卒正多蓋卒正其官而多其名下文坐法斬者卽此人推尋文義如淳師古解皆謬

亦坐兵至列口

方輿紀要列口城在朝鮮國王京西南胡氏曰洌水入海之口也

西域傳

蔥嶺

通典

邊防九

渴槃陀國理蔥嶺中俗號極疑山周環其國

新唐書西域傳開元中破平其國置蔥嶺守捉使安西

極邊戍也

舊書高仙芝傳自安西行十五日至撥換城又十餘日至掘瑟德又十餘日至疎勒又二

十餘日至蔥嶺守捉又行二十餘日水經注釋氏西域

至播蜜川又二十餘日至特勒滿川記曰有國名伽舍羅逝城內有水東北流出羅逝西山

山卽蔥嶺

河有兩原一出蔥嶺山一出于闐

水經注釋氏西域記曰阿耨達山卽崑崙山其山出六

大水山西有大水名新頭河經罽賓健越摩訶刺諸國

而入南海阿耨達山西南有水名遙奴山西南小東有

水名薩竿小東有水名恆伽此三水同出一山俱入恆水康秦扶南傳曰恆水之源乃極西北出崑崙山中有五大源枝扈黎大江出山西北流東南注大海枝扈黎卽恆水恆北有四國又東至五河口又西尼連水南注恆水又逕波麗國法顯曰恆水又東到多摩犁耆國卽是海口考阿耨達六水蔥嶺于闐二水之限與經史諸書全相乖異又云河水重源有三非惟二也一源西出捐毒之國蔥嶺之上西去休循二百餘里河源潛發其嶺分爲二水一水西逕休循國南在蔥嶺西又逕難兜國北又西逕罽賓國北又西逕月氏國又西逕安息國

南河水與蜺羅歧禘水同注雷翥海釋氏西域記曰蜺
羅歧禘水出阿耨達山之北西逕于闐國其水至安息
注雷翥海漢書西域傳云梨軒條支臨西海自條支乘
水西河可百餘日或河水所通西海矣故涼土異物志
曰蔥嶺之水分流東西西入大海東爲河源張騫使大
宛窮河源謂極于此而不達于崑崙也河水自蔥嶺分
源東逕迦舍羅國逕岐沙谷出谷分爲二水一水東流
逕無雷國依耐國蒲犁國皮山國北以上諸國並逕其北又東與
于闐河合南源遵于闐南山俗謂之仇摩置北流逕于
闐國西南河又東逕于闐國北又東北逕扞彌國北又

東逕精絕且末國北又東右會阿耨達大水釋氏西域

記曰阿耨達山西北有大水北流注牢蘭海者也會南

河東逝通爲注濱河

疑卽元時所
云赤賓河

注濱河又東逕鄯善

國北釋氏西域記曰南河自于闐東于北三千里至鄯

善入牢蘭海者也北河自岐沙東分逕疏勒温宿姑墨

龜茲墨山注賓樓蘭東注于泐澤卽經所謂蒲昌海也

按亦上文釋
氏之牢蘭海

以上約酈道元水經注所云者如此按彼

旣旁采異聞仍依附班書東注蒲昌海潛行出積石之

說唐杜祐通典駁之云窮究諸說悉皆謬誤今吐番中

河從西東數千里向東北流見與積石山下河相連聘

使涉歷無不言之吐番自云崑崙山在國中西南則河之所出也又按尙書織皮崑崙析支渠搜西戎卽敘范睡後漢書西羌在漢金城郡之西南濱于賜支蓋析支也然則析支在積石之西是河之上流明矣崑崙在吐蕃中當亦非謬而不謂河之本源乃引蔥嶺于闐之河謂從蒲昌海伏流數千里至積石方出斯又班生之所未詳也舊唐書吐蕃傳秃髮利鹿孤于樊尼爲沮渠蒙遜臨松太守及蒙遜滅樊尼率眾西奔濟黃河逾積石于羌中按元史地理志朱思本曰河源在中州建國開地千里西南直四川馬湖蠻部之正西三千餘里雲南麗江宣撫司之西北千五百餘里帝師撒思加之地西南二千

餘里潘昂霄志河源曰河源在吐蕃朶甘思西鄙有泉百餘泓沮洳散渙方可七八十里且泥淖弱不勝人跡旁履高山下眎燦若列星以故名火敦腦兒譯言星宿也

今呼鄂敦塔拉

羣流奔湊近五七里匯一巨澤名阿刺腦兒

自西徂東連屬吞噬廣輪馬行一日程迤邐東驚成川號赤賓河二三日程水西南來名亦里出合赤賓三四日程南來名忽蘭又水東南來名也里朮合流入赤賓其流寢大始名黃河然水清人可涉又一二日岐裂八九股名也孫幹論譯言九度通廣六七里馬亦可度又四五日程水渾濁土人抱革囊乘馬過之民聚落糾木

幹象舟傅毛萃以濟僅容兩人猶是兩山夾束廣可一
二里或半里深叵測矣朶甘思東北鄙有大雪山名亦
耳麻不莫刺其山最高譯言騰乞里塔卽崑崙也自八
九股水至崑崙行二十日程河行崑崙南半日程地又
四五日程至地名闊卽及闊提二地相屬又三日程地
名哈刺別里赤兒四達之衝也其東山益高地亦漸下
岸狹隘有狐可一躍越之者行五六日程有水西南來
名納隣哈刺譯言細黃河也又兩日程水南來名乞兒
馬出二水合流入河之北行轉西至崑崙山二日程地
水過之北流少東又北流約行半月程至貴德州地名

必赤里始有州事官府州緣河置土蕃等處宣慰司所轄又四五日程至積石州卽禹貢積石五日程至河州安鄉關一日程至打羅坑東北行一日程洮河水南來入河又一日程至蘭州按杜佑所言猶得自土蕃傳述至元都實三至吐蕃始窮源潘昂霄志之爲得其實也攷新唐書吐谷渾傳侯君集等討吐谷次星宿州達柏海上望積石山覽觀河源舊唐書吐蕃傳長慶元年大理卿劉元鼎爲吐蕃會盟使往來渡黃河上流在洪濟橋西南二千餘里其水極爲淺狹春可揭涉秋夏則以舩渡其南三百餘里有三山山形如鑲河源出其間

新書

云中高而四下曰紫山直大羊同國
古所謂崑崙者也虜曰悶摩黎山 水甚清冷流經歷

水色遂赤續爲諸水所注漸既黃濁又其源西去蕃之
列館約四驛每驛約二百餘里東北去莫賀延磧尾闊
五十里向南漸狹小北自沙州之西乃南入吐渾國至
北轉微故號磧尾計其地當劍南之直西此則唐代已
審其源但非版圖所屬迄不宣究耳戴震水地記云崑
崙今西番名枯爾坤有三山曰阿克塔沁曰巴爾布哈
最西而大曰巴顏哈喇其色紫黑產金銀番語謂黑哈
喇謂富巴顏自山東北至西寧府界千四百餘里唐劉
元鼎所言紫山與今巴顏哈喇符崑崙之山三成故爾

雅釋曰三成爲崑崙丘元使求河源誤以禹貢之積

石爲崑崙察其地勢山脈自紫山西連犛石山又南迤

西連接恆水所出山今番語呼岡底斯者

譯言羣山水根也值西寧

府西南五千五百餘里犛石山今西番呼巴撒通拉木
在喇撒伊克招之北八百餘里喇撒在四川打箭爐西
北三千四百八十里無城 緜亘二千里皆古崑崙之虛
有大廟西番呼伊克招

也犛水出犛石山與河源相去厯三百六十餘里中隔

一嶺卽巴顏喀喇之嶺犛水亦呼犛牛河語之轉爲麗

水今名金沙江

西番呼木魯烏蘇至喀木境又呼布賴楚

明洪武十一年命

宗泐往西番十五還宗泐言河源出抹必力赤巴山番

人呼黃河爲抹處犛牛河爲必力處赤巴者分界也其

山西南所出之水則流入犛牛河東北之水是爲河源

必力處卽布賴楚聲之轉也岡底斯水經注謂之阿耨

達山直古且末國南水經注序阿耨達山數水其北流

者逕且末城西

隋大業五年平吐谷渾于且末城置且末郡

在會于闐蔥嶺

之水入鹽澤西流者逕于闐安息右會蔥嶺西流之水

入雷轟海恆水則南流入南海用是知由岡底斯延綿

而西北抵蔥嶺實羣山之山脊也西海漢志爲仙海水

經注一名卑禾羌海一名青海流沙唐書所稱磧尾赤

水今之金沙江黑水今之潞江

亦作怒江

禹貢導河積石其

山自紫山岐分循河北岸而東積石之西紫山之東臨

星宿海者曰布虎吉魯懇亦名枯爾坤山有數峰又東

曰阿克塔齊欽有兩峰望之如馬耳又東曰烏監得什

南至扎凌淖爾四十里山高大頂平又東有嶺巖險多

障氣曰牟布拉克西南至鄂凌淖爾五十里又東曰寒

多嶺又東大山曰馬尼圖西南至鄂凌淖爾百二十里

又東曰碧柳圖

其南有山狀如牛曰阿喇克沙兒值黃河南流之東岸

又東禹貢

之積石也直西寧邊外西南五百餘里水道提綱大雪

山即古積石山在西寧府邊外五百三十餘里星宿海

之東千餘里漢志金城郡河關積石山在西南羌中是

也

河關故縣在今西寧府西南邊外

番語呼積石山曰阿木尼瑪勒占

木遜

謂祖阿木尼謂色班駁曰瑪勒占謂冰木遜

其山有九峯絲亘三百餘

里河行南繞東麓轉西卽梁寅河源記所言河繞山之

三面如玦然其西南山值河之東曰哈爾吉東有山二

峰高峻曰阿木尼殼懇古爾板

凡曰阿木尼者皆番人所望祭大山

河西轉之左曰烏藍芒奈有嶺北枕河曰哈爾吉盛夏積雪

多瘴氣元史地理志都實言甘思東北有大雪山名亦

耳麻不莫喇卽崑崙也云崑崙者誤水經注唐述山隋

唐間始有小積石之目魏王泰括地志云大積石在吐

谷渾界小積石山在抱罕縣西北唐李吉甫直以小積

石當禹貢之石

說見其郡縣志

此山在酈道元時尙不名小積

石而後漢書注及通典並誤後儒以之解經至元人遂
誤以大積石爲崑崙矣河之西岸青海西南二百餘里
曰占爾板依馬圖三山多羅淖爾在是山之麓東北曰
蘇羅巴顏哈喇多冷瘴山有石崖色黑其東嶺曰蘇羅
嶺在青海南少西二百餘里河北岸青海南百里有岡
曰巴爾拖羅海岡環青海十有五山番人皆呼烏爾圖
青海中小山曰龍駒島近西岸有峰曰插漢東西對峙
去玉門陽關三百餘里

水地記玉門關在故壽昌縣西百一十八里陽關在縣
西六里壽昌本漢龍勒縣地今安西府西百五十里有

壽昌城鹽澤去玉門陽關千三百餘里前後漢書皆脫去千字按水經注河水東注于泐澤卽經所謂蒲昌海也東去玉門陽關千三百里廣輪四百里據酈氏所見漢書尙有千字

置僮僕都尉

魚豢魏畧

西戎傳

貲虜木匈奴也匈奴名奴婢爲貲始建

武時匈奴衰分去其奴婢亡匿在金城武威酒泉北然則此云僮僕都尉者主簡閱人口

戊巳校尉屯田車師前王庭

新唐書西域傳高昌國田地城戊巳校尉所治

媚羌

明史西域傳安定衛距甘州西南一千五百里漢爲婁
羌唐爲吐蕃地元封宗室卜烟帖木兒爲寧王鎮之其
地本名撒里畏兀兒

不當孔道

太玄羨次五曰孔道夷如此言往來要道猶物之出入
必由于孔非謂穿山險之道

服刀

劉德云拍髀按釋名短刀曰拍髀帶時拍髀旁也又曰
露拍言露也周禮醢人豚拍杜子春以拍爲膊謂脊也

士喪禮作胎鄭云脅也今文胎爲迫是亦有百音故露
拍一作露陌御覽三百四十六魏文帝露陌刀銘云云舊唐
書李嗣業傳于時諸軍初用陌刀嗣業與郎將田珍爲
左右陌刀將

鄯善國

周書北卽白龍堆路新唐書故納縛波古樓蘭也魏書西域
傳世祖平鄯善比之郡縣

胡桐

嶺表錄異胡桐淚出波斯國是胡桐樹脂也象胥錄撤
馬兒罕貢物有胡桐蠟七十一西域錄云胡桐譯言柴

也其樹遍滿沙灘不任器用僅可取作燒柴夏日炎蒸
其津液自樹抄流出凝如琥珀者爲胡桐淚自樹身流
出色白如粉者名胡桐嫌

白草

後漢書西域傳西夜國地生白草有毒國人煎以爲藥
傅箭鏃所中卽死不如師古所說章懷注引漢書音義
與師古同蓋舊注而

師古撰
爲己有

姑師

卽車師

且末國

南史末國漢世且末國也通典其國西北有流沙數百里夏月有熱風爲行旅之患風之欲至老駝先知卽鳴而聚立埋口鼻于沙中人每以爲候卽將羶擁蔽鼻口其風迅駛斯須過盡若不防者必致危斃按魏書仍名且末國新唐書于闐東行入大流沙至故折摩馱那古且末也水經注南河又東逕且末國北又東右會阿耨達大水

小宛國

魏畧且志國志蓋末小宛國精絕國樓蘭國皆并屬鄯善

按樓蘭改名鄯善而復有樓蘭者史所不詳

精絕國

新唐書于闐東三百里有建德力河七百里有精絕國

戎盧國

魏畧戎盧國扞彌國渠勒國皮穴

穴卽山

國皆并屬于闐

扞彌國

新唐書建德力河之東有扞彌居達德力城亦曰拘彌城卽宜彌故城水經注南河白于闐又東逕扞彌國北又東逕精絕國北也方輿紀畧五代時于闐賞置州于此

渠勒國

新唐書于闐并有其地

于闐國

明史隋唐間侵并諸國其地益大

按此蓋未考魏畧已言之

南距蔥

嶺二百餘里東北去嘉峪關六千三百里大畧蔥嶺以

南撤馬兒罕最大以北于闐最大

按蔥嶺在今回部葉爾羌西南于闐卽和

闐在葉爾羌東南

方輿紀要于闐在哈密西南四千八百里

水東流

魏書蔥嶺之北二百餘里有大水北流號樹枝水卽黃河也一名計戍水城西五十五里亦有大水名達利水與樹枝水合俱北流按水經注河水蜺羅跂禘水同注雷轟海釋氏西域記曰蜺羅跂禘出阿耨達山之北西逕于闐國此傳所云于闐之水水皆西流者也又云南河東逕于闐釋氏西域記曰河水東流三千里至于闐

屈東北流此傳所云其東水東流者也魏史云北流當爲東北流耳

多玉石

魏書有首拔河

通典首拔河一名樹拔河新唐書復云東三百里有建德力河蓋胡言所傳各

異

中出玉石新唐書有玉河國人夜視月光盛處必得

美玉明史于闐國東有白玉河西有綠玉河又西有黑

玉河源皆出崑崙山

通考宋開寶元年遣使來貢言本國有玉一塊凡二百三十七斤願

進以上

皮山國

魏書蒲山國故皮山國役屬於闐

烏秣國

魏書權于摩國故烏秣國

累石爲室

卽今之碉房後漢書西南夷傳謂之邛籠隋書西域傳附國壘石爲磧而居

小步馬

孟康說是也明史西域傳納失者罕馬有數種最小者高不過三尺蓋小步馬師古云百步千跡者史傳所未見

縣度者石山也

魏書阿鈎羌國在沙車西南西有縣度山其間四百里
中往往有棧道人行以繩索相持而度因以名之釋法
顯西域傳曰度蔥嶺已入北天竺境于此順嶺西南行
十五具道艱阻崖岸險絕其山惟石壁立千仞臨之目

眩下有水名新頭河

通典越底延國
理辛頭河北

昔人有鑿石通路

施倚梯者凡度七百梯

通典陔羅伊羅在烏茶國北大
雪山坡上緣梯登山接七百梯

方到其國度已躡懸絙過河河兩岸相去咸八十步九譯所

絕漢之張騫甘英皆不至也酈道元云卽酈賓之境郭

義恭曰烏秬之西有懸度之國按酈賓正是漢所往來

何云張騫等未至乎通典云今按懸度蔥嶺迤邐相屬

郵置所絕道阻且長故行人由之莫能分別然法顯宋雲所經卽懸度山也

西夜國

云號子合王者誤也後漢書云漢書中誤云西夜子合是一國今各自有王魏書西域傳悉居半國故西夜國也一名子合其王號子治呼健魏史又未審也唐書朱俱波亦名朱俱槃漢子合國并有西夜蒲犁依耐得若四種地

蒲犁國依耐國

魏畧植中國莎車國竭石國渠沙國西夜國依耐國滿

梨國

卽蒲犁書蒲滿字多相亂

億若國榆令國捐毒國休修國朶國

皆并屬疏勒

無雷國

水經注河水自蔥嶺分源東逕迦舍羅國逕岐沙谷出谷分爲二水一水東流逕無雷國北

難兜國

水經注河源發蔥嶺分爲二水一水西逕休循國南在蔥嶺西又經難兜國北

蜀賓國

隋書漕國在蔥嶺之北漢時蜀賓國也新唐書蜀賓國

隋漕國也明史撒馬兒罕卽漢罽賓地方輿紀要罽賓國在撒馬兒罕東水經注恆水又東逕罽賓饒夷城城之西北六七里恆水北岸佛爲諸弟子說法處河水又西逕罽賓國北

治循鮮城

唐書顯慶三年以其地爲修鮮都督府

修循字互相亂

魏書云

都善見城

塞種分散

長阿舍經云我父名淨飯刹利王種又云我般涅槃後諸釋種來求爲道者當聽出家又云種姓一者刹利種

二者娑羅門種三者居士種四者首陀羅種

奇木檀榿

云奇木則榿非槐也西山經狀如棠葉赤實名曰榿木

流離

魏書大月氏國人商販京師自云能鑄石爲五色瑠璃
于是採礦山中於京師鑄之既成光澤乃美于西方來
者乃詔爲行殿容百餘人光色映徹觀者見之莫不驚
駭以爲神明所作然大月氏旣曉鑄作之法則知本非
自然之物顏籀乃強作解事

二千餘里乃到縣度

水經注作二十餘里

大頭痛小頭痛山

通典山在涅槃陀國西南宋膺異物志云山皆在渠搜之東疏勒之西夏不可行行則致死惟冬乃可行尙嘔吐山有毒藥氣之所爲也唐書喝槃陀都城員徒多河西南卽頭痛山

焉弋山離

魏畧一名排持

按後漢書云時改爲排持謂和帝時班超遣甘英窮西海時也通典以爲魏改

失考按下文北與撲挑通典作撲挑傳中無撲挑國疑是桃槐

之誤

犁軒

後漢書云大秦國一名犁鞞魏書都安都城唐書拂菻
古大秦也明史外國傳拂菻卽漢大秦唐曰拂菻宋仍
之亦數入貢而宋史謂歷代未嘗朝貢疑其非大秦也
水經注法顯曰恆水又東到多摩犁軒國卽是海口也

條支國

魏畧前世謬以爲條支在大秦西今其實在東

魏書云從條支

西度海曲一萬里從安息西界亦至大秦四萬餘里

前世又謬以爲強于安息今

更役屬之

按傳本云安息役屬之

號爲安息西界前世又謬以爲

從條支西行二百餘日今從大秦西近日所入

魏書云於彼國

觀日月星辰無異中國而前史云
條支西行百里日入處失之遠矣
魏書波斯國都宿利
城古條支國也按南史波斯國其先有波斯匿王者子
孫以爲氏攷佛書卽有波斯匿王或爲歌利或爲阿闍
世疑非條支隋書以爲條支之故地當是

有大鳥

南史有鷲鳥啖羊士人極以爲患按佛書卽金翅鳥彼
云以龍爲食

善眩

列子周穆王篇西極之國有化人來張湛曰化幻人也
又考成子學幻于尹文先生深思三月遂能存亡自在

幡校四時冬起雷夏造冰飛者走走者飛魏書悅般國
眞君九年遣使送幻人稱能割人喉脈令斷擊人頭令
骨陷皆血出盈斗以草藥內其口中令嚼咽之須臾血
止養瘡一月復常又言其國有大術者蠕蠕來抄掠術
人能作霖雨狂風大雪蠕蠕凍死者十二三

條又有弱水

舊唐書高仙芝傳仙芝討小勃律至坦駒嶺娑夷河卽
古之弱水也不勝草芥毛髮畢尙書沅校山海經據寰
宇記延州保安軍之吃莫
河以爲弱水非也弱
水寧當在中國乎

挑拔

後漢書符拔形似麟而無角與孟康說異蓋亦駁類師古注此節若恐人不知師子之爲狻猊真可笑也

安息國

隋書安國漢時安息國也新唐元魏謂之忸密按魏書忸密國都忸密城安息國在蔥嶺西都蔚搜城則爲二國也

有大馬爵

魏書波斯國有鳥形如羣駝有兩翼飛而不能高食草與肉亦能噉火通典吐火羅國高宗永徽初遣使獻大馬高七尺足如駝鼓翅而行日三百里能噉鐵夷俗謂

爲駝馬

臨媯水

唐書安國西瀕烏澹河通典吐火羅在烏澹河南卽媯水也

書革旁行

南史滑國羊皮爲紙通典天竺國其人皆學悉曇章書于貝多樹葉以記事法苑珠林造書有三人長名梵其書右行次曰佉盧其書左行少者倉頡其書下行明史默德那其書旁行兼篆草隸三體

大鳥卵

呂覽本味流沙之西丹山之南有鳳之丸沃民所食

注九

古卯字也

犁軒眩人

通典武帝時安息獻犁軒幻人二皆蹙眉峭鼻亂髮拳

須長四尺五寸魏畧大秦國俗多奇幻口中出火自縛

自解跳二十九巧妙

通典大秦國幻人能額上爲炎燧手中作江湖舉足而珠玉自墮開

口則旛旄亂出宋祁作唐書更之云口旛旄舉足墮珠玉僅省六字便令讀者不可曉凡宋祁改作類皆如此

大月氏國

王會解伊尹四方令曰正北月氏其名久矣治監氏城

後書作藍氏城北史作騰監氏通典至後魏北與蠕蠕

接數爲所侵遂西徙都薄羅城

物類所有

郭璞西山經注曰大月氏有大羊如驢而馬尾玄中記
大月氏有牛名日及今日取其肉明月瘡愈

一封橐駝

魏書迷密國遣使獻一峯黑橐駝通典杜環經行記云
大食國其駝小而鬃背有孤峯良者日馳千里蓋駝皆
兩封故以一封爲貴師古不知其故又非封牛也南史
滑國又有兩腳駱駝宋史外國傳天聖三年于闐貢獨
峯橐駝嘉祐八年以所獻獨峯橐
駝還之皇明象胥錄祖法
兒國駝單峯雙峯皆可乘

大夏

海內東經國在流沙外者大夏

郭云大夏國城方二三百里分爲數十里按郭

誤以爲大秦也

王會解大夏茲白牛新唐書大夏卽吐火羅

休密翎侯

魏書伽倍國故休密翎侯

雙靡翎侯

魏書薛莫孫國故雙靡翎侯

貴霜翎侯

魏書鉗敦國故貴霜翎侯按後書貴霜攻滅四翎侯自立爲王因號貴霜王旣云攻滅四侯而魏又有五國未

知孰是

胙頓翎侯

魏書弗敵沙國故胙頓翎侯通典弗敵沙在藍氏城東
二千一百里

高附翎侯

魏書閭浮謁國故高附翎侯後書作都密云高附國在
大月氏西南亦大國漢書以爲五翎侯數非其實也

魏屬賓國大夏國高附國天竺國皆并
屬大月氏按屬賓天竺不當在其數

康居國

魏書者舌國故康居國又云康國者康居之後通典云

至隋時謂之康國彼不核魏已有康國也疑者舌之稱非實新唐書又云康者一曰薩未鞬亦曰颯秣元魏所謂悉萬斤然魏不言悉萬斤爲康國

夏所居蕃內

寰宇記亦居蘇薤城自漢後無聞或名號變易或遷徙吞并非所詳也

此承通典語

按後書西域傳不著康居故有

此疑然班超傳疏勒王忠說康居借兵魏畧西北有烏孫康居是漢魏並有康居魏書自漢以來相承不絕舊居祁連山北昭武城因被匈奴所破西踰蔥嶺遂有其國蓋遷徙當在晉後

奄蔡國

魏畧奄蔡國一名阿蘭其國多名貂故時羈屬康居今不屬也魏書粟特國在蔥嶺之西古之奄蔡一名温那

沙

後書作阿蘭聊

康居有小王五

佛書謂小王爲粟散王魏畧大秦別枝封小國曰澤散王卽其語相近新唐書石國治柘折城故康居小王窟匿城地安國元魏謂忸密治河濫謐城卽康居故地火尋國居烏澗水之陽東南六百里乃康居小王輿鞬城故地何國卽康居小王附墨城故地史國居獨莫水南

康居小王蘇雍城故地

大宛國

魏書破洛那國故大宛國都貴山城通典隋時蘇對沙

那國卽漢大宛也

唐書寧遠本按汗那或曰鑠汗元魏時謂破洛那不言是大宛按北

史鑠汗國古渠搜國西去蘇對沙那國五百里則鑠汗

別一國宋祁謂破洛那者非也杜環經行記若國城一

名赭支一名大宛

唐書又云石國漢大宛北鄙

蓋地界錯雜譯語異

同故致糾紛

元史類編云晉爲代王什翼健之地按什翼健只在代郡雲中朔方不至西域其謬

可勿論七十一西域聞見錄哈薩克伊犁西北一大國也卽之大宛

以蒲陶爲酒

魏書康國多蒲陶酒富家或致于石連家不敗明史哈烈國以蒲萄釀酒憲章類編洪武七年七月西蕃獻葡萄酒隋書赤土國以甘蔗作酒雜以紫瓜根酒色黃赤味亦香美亦名椰漿爲酒宋史三佛齊國有柳花酒椰子酒檳榔酒皆非麴蘖所醞飲之亦醉又闍婆國其酒出于椰子及蝦蟇丹樹之中蝦蟇丹樹華人未嘗見或以桄榔檳榔釀成亦甚香美按南史扶南傳頓遜國有酒樹似安石榴采其花汁停瓮中數日成酒是諸花果無不可爲酒不獨蒲萄也長白七十一西域錄云夏初桑椹熟回人取以釀酒家各數石桃熟亦可釀酒味微

酸因知杜甫詩蘆酒多還醉陸龜蒙詩檣酒三瓶寄夜
航非虛言也

馬汗血

後書東平王蒼傳宛馬血從前膊小孔中出

宋膺異物志大宛馬

有內角數寸或有解人語及知音舞與鼓節相應者

通典吐火羅國城北有頗黎

山南崖穴中有神馬國人每牧馬于其側時產名駒皆
汗血馬其北界則漢時大宛之地

桃槐國

新唐書地理志龍朔元年以阿臘城置桃槐州

休循國

水經注廣志曰休循國居蔥嶺新書高宗顯慶三年以
寧遠渴塞城爲休循州都督

治鳥飛谷

新書獲密元魏所謂鉢和顯慶時以地爲鳥飛州

捐毒國

海內經作天毒郭璞云卽天竺國身毒捐毒皆聲同而

文異

索隱身音乾毒音篤故此傳前作天篤呂覽去宥篇列宥則能全其天矣注天身也董子深察名號

篇身猶天也此通典地方三萬里其中分爲五天竺東

天身音義並同南北地各數千里城邑數百南天竺際大海北天竺距

雪山四周有山爲壁南面一各通爲國門東天竺東際

大海與扶南林邑鄰接但隔小海而已西天竺與蜀賓

波斯相接中天竺據四天竺之間國並有五新書中天竺都城曰

茶鐸和羅城北史南天竺國有伏醜城東三百里有拔賴城都臨恆河一名迦毘黎

河水經注枝扈魏晉代絕不復通按海內經注晉太興

獻通考五印度即天竺也自此印度行百二十日至中

印度自南印度南明史外國傳榜葛刺即漢身毒國東

漢曰天竺其後中天竺貢于梁南天竺貢于魏唐亦分

五天竺又名五印度宋仍名天竺據通考榜葛刺則東

印度也沿納樸兒其國在榜葛刺之西或言即中印度

按史記大宛傳與班書張騫傳有身毒至此傳有損毒

而無身毒故杜祐等並指是一國然核其道里身毒比諸國為尤遠而其敘捐毒反在蔥嶺休循之東則非身毒矣或是小種流迸逾蔥嶺而託國班氏不詳其始末故後人滋惑

李光地至云其國本後人迎佛一事張大之耳則以後人之史竟一不足憑乎

魏畧云天竺國屬月氏捐毒國屬疏勒其屬之遠近可推國之殊異可證矣

西京雜記武帝時身毒國獻連環光琉璃為鞍轡在閩室中常照十餘丈如晝日

莎車國

魏書渠沙國居故莎車城

疏勒國

隋書疏勒國都白山南

通典西域圖云白山一名阿耨山常有火及烟卽是出礪沙之處

手足皆六指產子非六指者不育新唐書其人文身碧瞳王姓裴氏自號阿摩支

尉頭國

魏畧姑墨國温宿國尉頭國皆屬龜茲

烏孫國

魏書後其國數爲蠕蠕所侵西徙蔥嶺通典西突厥大

選便

木杆可汗之了

初木杆與沙鉢畧可汗有隙因爲分二

便卽阿

波可汗其國居烏遜之故地

治赤谷城

新唐書地理志賈耽云度拔達嶺五十里至頤多城烏
孫所居赤山城也

公主悲愁自爲作歌

舊唐書音樂志琵琶四弦漢樂也初秦長城之役有弦
鼗而鼓之者及漢武帝嫁宗女子烏孫乃裁箏筑爲馬
上樂以慰其鄉國之思

通典樂思引傳
玄琵琶賦同

今清樂奏琵琶

俗謂之秦漢子圓體修頸而小疑是弦鼗之遺志其他
皆兌上充下曲項形制稍大疑此是漢制兼似兩制者
謂之秦漢蓋謂通用秦漢之法

星靡怯弱可免

免王也干寶晉記總論易天子以太上之號而有免官之謠李善注引臧榮緒晉書曰中書謬播云太史案星變事當有免官天子雖事蘭言亦有所本

姑墨國

新唐書自龜茲六百里踰少沙磧有跋祿迦一日亟墨卽漢姑墨國

溫宿國

師古注云云按隋書地理志醴泉縣有溫秀嶺恐不緣溫宿國人得名也此方俗鄙談宋次道作長安志采其語尤爲無識

龜茲國

魏書東有輪臺卽漢貳師將軍所屠者其南三百里有大河東流號計式水卽黃河也俗性多淫置女市收男子錢入官新唐書太宗命阿史杜那爾討龜茲執其王訶黎布失畢高宗時徙安西都護府于其國通考宋太宗時入貢其國主自稱師子王方輿紀要龜茲國在亦力把力東南

連城而西

水經注敦薨之水又西山沙山鐵關谷又西南流逕連城別注裂以爲田桑弘羊云屯田卽此處也

徵事臣昌

此後有高昌壁在車師魏書高昌國云其地有漢時高昌壘故以爲國號然此臣昌當卽高昌也徵事丞相屬廝留

方言廝披散也東齊聲散曰廝器破曰披廝與廝義同

宋本方言亦作廝

諸大夫郎爲文學者

作一句讀所謂文祿大夫等若夏侯勝之稱

使巫埋牛羊

北史高車俗不潔清喜致震霆每震則叫呼射天而弃

之移去來歲秋馬肥復相率侯于震所埋殺羊然火拔
刀女巫祝說如中國祓除蓋北狄之俗類然

失一狼走千羊

失謂逸出也匈奴自比狼比漢于羊

亦上集不得

言上軍簿時皆不能得其闌出之數非謂守烽火之卒
奔亡

昭帝乃用桑弘羊前議

鹽鐵論伐功篇文學曰前君爲先帝畫匈奴之策兵據
西域奪之便勢之地以候其變上以爲然用君之計以

搜索都尉爲御史大夫持政十有餘年未見種蠶之功而見靡弊之效是君之冊不能弱匈奴而反衰中國也西域篇大夫曰羣臣議以爲匈奴困于漢兵折翅傷翼可遂擊服會先帝弃羣臣以故匈奴不革譬如爲山未成一簣而止度功業而無斷成之理是弃與胡而資強敵也按培克聚斂之臣未有不喜邀功生事桑弘羊終始西域幸悟于武帝之晚年而復倡于幼主此卽宋章惇蔡卞紹述之說也教猱升木小人之害可勝言哉

田輪臺

方輿紀要輪臺城在廢庭州西北百三十里

驢非驢馬非馬

楚策史疾謂楚王曰此烏不謂烏鵲不爲鵲也

尉犁國

魏書世祖詔成周公萬度歸入焉耆東界擊其左回尉犁二城拔之

危須國

魏畧尉犁國危須國山于國皆并屬焉耆

焉耆國

魏書都員渠城白山南七十里萬度歸進軍向員渠屠其城命度歸鎮撫按隋書不著復國之由

魏高昌傳太和中焉耆又

爲噉噉所破滅國人分散不自立請王于高昌王麴嘉嘉遣第二子爲焉耆王以主之按此前爲魏滅不久卽復其後焉耆國則非舊種也至唐郭孝恪執其王突騎支以其地焉耆都督府與于闐碎葉疏勒爲四鎮元史類編元初定其地更名別失八里明史別失八里西域大國或曰焉耆或曰龜茲方輿紀要亦力把力在哈密西一千六百里七十里焉耆龜茲二國地元初地名別失八里永樂十六年更號亦力把力

烏貪訶離國

前文處匈奴降王茲力支後爲車師所滅

卑陸國

後書車師前後部及東且彌卑陸蒲類移支是爲車師六國

郁立師國單桓國

後書爲車師所滅

乾隆志迪化州阜康縣漢烏貪訾離國單桓國地

蒲類國

寰宇記庭州蒲類縣取縣西蒲類海以爲名亦名娑悉海

東西且彌國

魏畧北新道西行東至且彌國而且彌國單桓國卑陸國蒲陸疑卽類國烏貪國皆并屬車師後部方輿紀要在

火州西北

劫國

通典劫國隋時聞焉在蔥嶺中西南與賒彌國按界西北至挹怛國按其地則名同而處異

狐胡國

後書爲車師所滅後皆復其國

山國

水經注河水又東逕墨山國南治墨山城西至尉犁二百四十里趙一清曰漢書脫去墨字師古遽以臆解之更不識所居何山所治何城觀鄭注甚明可補史傳之

缺文按魏畧云自中道至山王國疑亦墨山之脫文也

車師前王國

元和郡縣志晉成帝咸和中置高昌郡

魏書亦云據晉地理志但有晉

昌郡無高昌

後魏太和時有闕爽者自爲高昌太守眞君中

爲沮渠無諱奪據之無諱死弟安周立爲蠕蠕所併以闕伯周爲高昌王高昌稱王自此始隋書高昌國漢車師前王庭去敦煌十三日行其境唐書貞觀十四年侯君集滅高昌皆州縣之號西昌州後改曰西州更置安西都護府通考安史之亂其地陷役復自爲國其地頗有回鶻故亦謂之回鶻太平興國六年其王始稱西州

外生師子王阿斯蘭漢遺都督麥溫來獻

元史類編畏吾兒國卽唐

之高

明史火州又名哈刺在柳城七十里

柳城唐柳中縣

土魯

番東三十里卽漢車師前王地元名火州方輿紀要在

哈密西七百里

治交河城

寰宇記西州交河縣本車師前王庭明史土魯番在火

州西百里唐西州支河縣安樂城也

車師後國

魏畧車師後部王治于賴城魏賜其王壹多雜守魏侍

中號大都尉魏書車師國一名前部爲沮渠無諱所攻

按前部已置高昌郡此當是後部也元和志西州蒲昌

縣貞觀十四年置本名金蒲城車師後王庭天山軍在

州城內烏孫之東境也

後書云後部西通烏孫

寰宇記庭州後庭

縣即車師後王庭之地方輿紀要庭州城在火州北四

百十里

按後書耿恭傳恭屯後王部金蒲城匈奴破殺後王安得而攻金蒲城然則後王庭與金蒲城

各一處班氏云治務塗谷通典貞觀中唐征高昌于時西突厥屯兵于可汗浮圖城與高昌相影響及高昌既

平懼而來降以其地為庭州浮圖城當即務塗谷核後部之地宜在庭州

王尙在其北石城中

新唐書地理志交河縣北八十里有龍泉館又北入谷

蒲昌縣有石城鎮通考王延德使高昌行程云歷交河

州凡六日至今嶺口寶貨所出

漢使侍郎殷廣德青烏孫求車師王烏孫貴將詣闕

師古謂烏孫遣其將之貴者入漢朝按漢求車師王而烏孫乃以貴將償之于理得釋乎師古妄人如小兒之學語可笑也劉原父謂烏孫遣其貴人將王詣闕是矣然車師王本名烏貴其故誤衍一孫字遂致謬解前文王烏貴輕騎奔烏孫鄭吉巴傳送車師王妻子詣長安矣故此下云賜第與其妻子居就此一傳方幅之間而不能讀猥稱汪家實爲可愧

有新道出五舩北通玉門關

魏畧前有二道今有三道從玉門關西出經婁羌轉西

越蔥嶺經縣度入大月氏爲南道從玉門關西出發都

護井回三隴沙北頭經居盧倉從沙西井轉西北按此卽烏

孫傳云穿卑鞬侯井以西者是過龍堆到故樓蘭轉西詣龜茲至蔥嶺

爲中道從玉門關西北出經橫坑辟三隴沙及龍堆出

五船北到車師界戍已校尉所治高昌轉西與中道合

龜茲爲西道魏書出西域本有二道後更爲四出自玉

門渡流沙西行二千二百里至鄯善爲一道自玉門渡

流沙北行二千二百里至車師爲一道從莎車西行二

百里至蔥嶺西一千三百里至伽倍爲一道自蔥嶺莎

車西南五百里蔥嶺西南一千三百里至波路爲一道
按元龍所云四出在漢時仍是二出言者謬耳漢本自從玉門關起程不數其中莎草道

避白龍堆之厄

一統志白龍堆在安西廳沙州衛西舊志沙形如土龍
無頭有尾高大者二三丈卑者丈餘東倚三危北望蒲
昌是爲西極要路

挂置

挂謂開道棧閣之事置則郵置也師古與劉說儲峙者
並非

通犀

通典大秦國有駭雞犀

師子

明史迭里迷在撒馬兒罕西南城在河朮河東西多蘆
林產獅子初生日閉七日始開土人於日閉時取之調
習其性稍長則不可馴矣

猛犬

王會解渠叟以鬣犬能飛食虎豹通典大秦國贊出西
海如狗多力郭璞爾雅注贊出西海大秦國贊卽贊之
訛

馮玉几

西京雜記漢制天子玉几冬則加綈飾其上謂之綈几以象牙爲火籠籠上皆散華文後宮則五色綾文公侯皆以竹木爲几冬則以細罽爲橐以馮之不得加綈飾海中碣極

西京賦複陸重闕轉石成雷礚礚激而增響磅礚象乎天威又云畫地成川流謂通涇此蓋海中碣極之戲

魚龍

師古所云魚龍者謂舍利之獸見續志注蔡質廣博物志鄭氏婚禮謁文讚曰舍利爲獸獸而能謙禮義乃食口無譏譽蓋麒麟之屬

外戚傳

父不能得之子

秦策莊謂王稽曰父之于子也令有必行者必不行者
曰去貴妻賣愛妾此令必行者也因曰毋敢思也此令
必不行者也後書暉引此語

美人良人

魏書后妃傳美人視三品魏志良人視千石晉書武帝
列司冀充豫四州二千石將吏家補良人以下
八子七子長使少使

秦昭王孝文王母芊八子唐八子是也許皇后傳有田

八子班婕妤馮昭儀亦嘗爲少使長使後魏皇后傳中

使視四品

六典晉台中使
大使碧綸綬

婕妤

褚少孫補云武帝時幸夫人尹婕妤彤夫人號姪娥眾
人謂之姪何姪何秩比中二千石容華秩比二千石漢
官舊儀曰婕妤見大長秋稱謝皇后爲婕妤下與坐稱
起禮比丞相姪娥見女御長稱謝比將軍御史大夫
侍中左右近臣見皇后如見帝婕妤行則對壁坐則伏
茵婕妤以下皆居掖庭置令丞廬監宦者西京雜記漢
掖庭有月影臺靈光殿九華殿鳴鸞殿開襟閣臨池觀

不在簿籍皆繁華窈窕之所棲宿

新唐書溫造傳野狐落者宮人所居也

俗華充依

俗依字誤加人旁周禮序官注云內司服有女御者以衣服進或當于王廣其禮使無色過鄭正據充衣爲義也宋書后妃傳容華充衣前漢舊號隋書禮儀志順儀順容順華修儀修容修菲充儀充容充華是爲九嬪其名皆本此

南史南康王子琳母荀昭華盛寵後宮才人位登采女依例舊賜玉鳳皇荀時爲采女得

玉鳳皇投地曰我不能例受此乃拜爲昭華

五官

魏書后妃傳五官視三品按隋書后妃傳開皇二年採

漢晉舊儀置六尚六司六典遞相統攝以掌官掖之政
然是漢宮亦有此職飛燕外傳有承光司帟樊嬀承光
司劑上官嫵其品秩不詳畧當五官之員耳元后傳王
官般嚴王
飛君等

保林

東宮亦有此號晉書愍懷太子傳考竟謝淑妃及太子
保林蔣俊隋書后妃傳寶林二十四員品正第五

家人子

西京雜記漢絳女常以七月七日穿七孔針于開襟樓
俱以習之

五官以下葬司馬門外

此指從殉者不則奉陵女耳清波雜志唐內人墓謂之宮人斜四時遣使祭之

戚姬愛幸

西京雜記戚夫人善鼓瑟帝常擁戚夫人倚瑟而弦歌畢每泣下流漣夫人善爲翹袖折腰之舞歌出塞入塞望歸之曲侍婢數千皆習之後宮齊首高唱聲入雲霄日夜啼泣欲立其子

西京雜記戚夫人侍兒賈佩蘭後出爲扶風人

按是時未有扶

風段儒妻說在宮內時見戚夫人侍高帝常以趙王如

意爲言而高祖思之幾半日不言歎息悽愴而未知其術輒使夫人擊筑高祖歌大風詩以和之

鞠域中

史記作厠中文選景福殿賦注李尤鞠室銘曰圓鞠方墻放象陰陽法月衝對二六相當此謂楚鞠之域也陸士衡集有鞠歌行序曰按漢官閣有含章鞠室靈之鞠室

張辟彊爲侍中年十五

法言重黎篇或問甘羅之悟呂不韋張辟彊之覺平勃皆以十二齡恐彼連甘羅而悟史記呂后紀亦云年十

五

我壯卽爲所爲

陳景雲曰謂壯後惟其所爲意欲報復也尋下文語自
明顏注誤

竇皇后親早卒葬觀津

御覽

三百九十六

三輔決錄曰文帝竇后名漪清河觀津人

父遭秦之亂隱身漁釣墜淵而卒景帝卽位后登尊號
遣使者更填父所墜淵而築起大墳觀津城南青山是
也按唐書竇建德傳建德遣使往觀津祠竇青之墓置
守冢二十家又以青爲竇父名也九域志冀州武邑縣

有觀津鎮

夢日入其懷

漢武內傳未生之時景帝夢一赤彘從雲中下直入崇芳閣景帝覺而坐閣下果有赤龍如霧來蔽戶牖宮內嬪御望閣下有丹霞蔚蔚而起霞滅見赤龍盤迴棟間景帝使王夫人移居崇芳閣改爲猗蘭殿旬餘景帝夢神女捧日以授王夫人夫人吞之十四月而生武帝御覽八十漢武故事曰景帝又夢見高祖謂己曰王美入四子可名爲彘及生男曰因名之焉年七歲爲太子上曰彘者徹也因改曰徹

扶將出拜

說文將扶也集韻或作擗通作將古詩多用扶將字孔雀東南飛篇云好自相扶將木蘭詩出郭相扶將

乃取主女爲妃

御覽八十漢武故事曰長公主抱着膝上問曰兒欲得

婦否膠東王曰欲得婦問曰阿嬌好否於是笑對曰若得阿嬌作婦當作金屋貯之也

幾死者數焉

謂欲致子夫子死大長公主執囚衛青欲殺之亦因子夫也

挾婦人媚道

周官內宰禁其奇衰鄭云若今媚道賈氏云鄭舉漢法證經列女傳夏姬美好無匹內挾伎術蓋老而復壯者三此類也嶺表錄異紅飛鼠多出交趾及廣管瀧州背腹有深毛茸茸多雙伏紅蕉花間採捕者若獲一則一不去南中婦人皆買而帶之以爲媚藥

居長門宮

文選長門賦序陳皇后在長門宮愁悶悲思聞蜀郡成都司馬相如天下工爲文奉黃金百斤爲相如文君取酒而相如爲文以悟主上陳皇后復得親幸按末云復

得親幸著述之體皆著其效驗說宛國策皆然

郎官亭東

水經注在長安東南三十里

子夫侍尙衣

六典宮官晉令有崇德殿大監尙衣尙食大監並銀章
艾經晉灼所謂五尙之衣指此

侯者五人

褚少孫補世家云天下歌之曰生男無喜生女無怒獨
不見衛子夫霸天下

尹儉仔

補世家云尹夫人與邢夫人同時並幸有詔不得相見
尹夫人自請武帝廟願望見邢夫人帝許之卽令他夫
人飾從御者數十人爲邢夫人爲此尹夫人前見之曰
此非邢夫人身也帝曰何以言之對曰視其身貌形狀
不足以當人主矣于是詔使夫人衣故衣獨身來前尹
夫人望見之曰此真是也於是乃低頭俯而泣自痛其
不如也

城南桐柏

長安志皇覽曰衛思后葬長安城東南桐柏園今千人
聚是關中記曰宣帝以倡優雜伎千人樂思后園

每爲新聲變曲

御覽

五百七十二

風俗通曰張仲春武帝時人善雅歌與李

延年同時每奏新歌莫不稱善

上乃召見之

西京雜記武帝過李夫人就取玉簪搔頭自此後宮人搔頭皆用玉玉價倍貴焉

上以后禮葬焉

長安志李夫人墓亦名習仙臺崇十二丈周二百六十六步水經注曰李夫人冢冢形三成世謂之英陵

弦歌之

捨遺記武帝思懷李夫人不可復得時穿昆靈之池泛
翔禽之舟帝自造歌曲使女伶歌之時日已西傾涼風
激水女伶歌聲甚道因賦落葉哀蟬之曲曰羅袂兮無
聲玉墀兮塵生虛房冷而寂寞落葉依于重局望彼美
之女兮安得感余心之未寔帝息于延涼室臥夢李夫
人授帝蘅蕪之香帝驚起而香氣著衣枕歷月不歇遂
改延涼室爲遺芳夢室

櫟絕

甘誓作勦絕釋文勦子六反玉篇子小反馬本作巢與
玉篇切韻同

毛居正六經正誤云勦絕作勦絕之勦從
勦從刀音子六反截也非從力也從力者

音尺六反攢取也按說文剝絕也引夏書天用剝絕其曲禮毋勦說是也

命廣雅剝天也則剝乃正字作巢者或體或乃省刀此

又加木旁非也說文櫟澤中守草樓徐鍇曰左傳登櫟

車以望又一切經音義通俗文浮取曰櫟廣雅櫟取也

亟菱扶

上林賦實葉稜茂張揖曰亟也司馬彪云大也玉篇廣韻並云

菱胡菱香菜又菱艾稜同非此義說文蘊屬也稜茂字音俊

不為綏音或借為鞋耳

洿沫悵兮

方言汜濶洿也戴震曰洿汙古通用按沫與類同說

文沫洒面也又頽古文沫郭忠恕汗簡頽古文沫

喧不可止

喧當爲咍方言朝鮮洌水之間少兒泣而不止曰咍說文朝鮮謂兒泣不止曰咍又爰暖哀也郭云暖哀而恚也音段廣雅爰暖愁也曹憲云方言音段戴震曰段卽段之訛盧文弨曰段卽段字見篇海集韻段古作段然咍暖皆哀泣之義于字喧誤也

媯妍太息

晉灼云面省瘦曰媯冥說文醮面焦枯小也華氏職注杜子春云媯讀爲細目媯之媯媯皆醮之訛當從說

文作醮

拳夫人

長安志列仙傳曰鉤弋夫人齊人少好清淨病臥六年
右手拳飲食少望氣者云東北有貴人推而得之召到
姿色甚佳武帝反其手得玉鉤而手尋展

聞昔堯十四月而生

廣博物志女秋有娠十四月而生夏禹

葬雍門

當在扶風之雍縣故下云詔右扶風置園邑二百家若
是長安雍門無爲特命右扶風也宋次道作長安志盡

承師古瓊說未考也

以憂死

褚少孫補後數日帝譴責鉤弋夫人夫人脫簪珥叩頭
帝曰引持去送掖庭獄夫人還顧帝曰趣行女不得活
夫人死雲陽宮時暴風揚塵百姓感傷其後帝閉居問
左右曰人言云何左右對曰人言且立其子何去其母
乎帝曰然是非兒曹愚人所知也往古國家所以亂由
主少母壯也女主獨居驕蹇淫亂自姿莫能禁也汝不
聞呂后也

愚按武帝懲呂后而殺趙鉤弋然亡漢者由
謹慎之元后索虜踵漢武帝之故習而馮后

以皇后不死逞其淫毒胡貴嬪偶爾不死遂覆洛京蓋
有國有家不以道御之事故萬端何能一慮故論家法

推宋爲善矣

年甫六歲

荀悅紀削此語按昭帝十三歲不知六歲幼女何以辟合庾信集爲婦人墓銘多有年十二三嫁者固不足異矣

逐麋之狗當顧菟耶

淮南說林逐鹿者不顧菟

窮袴

方言禪陳楚江淮之間謂之褌說文褌幘也玉篇褌小禪也窮與褌聲同而變文也又方言小袴謂之褌

郭云今繚袴也廣雅衤禕謂之幪幪無襠者謂之袞然則小袴有襠大袴無襠袴亦亦是緄帶纏繞之義一說云古者婦人袴皆無襠有襠自昭帝時始出疑中華古今注魏文帝賜宮人緋交襠卽混也按周仁爲溺袴亦其類也南齊書東夷傳高麗俗服窮袴

史良娣

西京雜記宣帝被奴繫郡邸獄臂上猶帶史良娣合采婉轉絲繩係身毒國寶鏡一枚大如八銖錢按漢無八銖錢舊傳此鏡見妖魅得佩之者爲天神所福及卽大位每持此鏡感咽移辰常以虎魄筭盛之

有良娣有孺子

宋書后妃傳爲太子置內職二等曰保林曰良娣魏書
孝文帝爲太子恂聘彭城劉長榮陽鄭愨女爲左右孺
子按左傳南孺子之子列女傳四衛夫人謂傳妾曰孺
子養我甚謹則通稱貴妾爲孺子又王子侯表東城侯
遺爲孺子所殺則列侯亦有孺子

當之柳宿

元和志柳宿城在定州望都縣東南四十二里宣帝母
王夫人微時泣別于此地

廣漢重令爲介

按文以張賀爲掖庭令已爲之齋夫故重其媒介不以
嫗言中阻也注乃云更令人作媒直是不顧上文義

心儀

服虔音螳者韻會四紙儀語擬切擬也引此傳文宋玉
高唐賦惟高唐之大體兮殊無物類之儀比是以儀爲
擬之證也

求安池監

安邑鹽池也一統志大安池在解州芮城縣南十五里
居民引以溉田下流入于河或此安池

太允

晉灼云澤蘭丸之屬按甄權本草澤蘭主治產後腹痛
頻產血氣衰冷成勞瘦羸婦人血滯腰痛蘇頌曰澤蘭
婦人方中最爲急用古人治婦人方澤蘭丸甚多

藥中得無有毒

方言南楚飲毒藥憊謂之氏惆亦謂之頓愍猶中齊眠
眩也按本草附子辛温有大毒

亦未敢重謝衍

西京雜記霍光妻遺淳于衍蒲桃錦二十四匹散花綾

二十五匹

綾出鉅鹿陳寶光家寶光妻得其法霍顯召
入其第使作之機用一百二十織六十日成

一匹匹

直萬錢又與走珠一緋綠綾百端錢百萬黃金百兩疑

字
爲起第宅奴婢不可勝數衍猶怨曰吾爲爾成何功
而報我若是哉

葬昆吾亭東

一統志鼎湖宮昆吾亭俱在藍田縣西南杜甫詩昆吾
御宿自委蛇是也

后父重於帝舅

御覽四百袁嶠與褚左軍解交曰皇后踐登正祚臨御
十
皇朝將軍之於國外姓之太上皇也公羊說天子不臣

王后之父

妾薄命

玉臺新詠曹植有妾薄命詩二篇本于此

俟自見索言之

漢舊儀皇后五日一上食賜上左右酒肉留宿明日平旦歸中宮按此云自見蓋五日之期也

條刺

釋名書稱刺書以筆刺簡之上也畫姓名於秦上曰畫刺

左皇后

其後劉聰及周宣帝竟有此號

還徙長定宮

黃圖三輔決錄曰后從帝行幸于甘泉宮居長定宮則甘泉亦有長定宮此非甘泉之長定宮也黃圖誤

葬延陵交道廐西

一統志交道廐在西安府咸陽縣西北長安志去長安六十里

再就館

元史祭祀志凡后妃姪身將及月辰則移居于外壇帳房若生皇子孫則錫百官以金銀綵段謂之撒答海及彌月復還內寢

成帝遊于後庭

拾遺記成帝于太液池旁起宵遊宮以漆爲柱鋪黑緋之幕器服乘輿皆尙黑色宮中美御皆服皁衣自班婕妤已下咸帶玄綬簪佩雖如錦繡更以木蘭紗綃罩之至宵遊宮乃秉燭宴幸旣罷靜鼓自舞而步不揚塵

同輦載

藝文類聚引漢官儀曰皇后僮仔乘輦餘皆以茵四人輿以行

陽祿柘觀

黃圖上林苑有陽祿觀陰德觀柘觀

仰視兮雲屋

西京雜記咸帝設雲帳雲幄雲幙于甘泉紫殿世謂三雲殿按與上丹墀皆是思君之處非泛指雲狀師古謬長安宮人

漢舊儀宮人擇官婢年八歲以上侍皇后以下年三十五出嫁

屬陽阿主家

伶玄飛燕外傳事陽阿主家爲舍直常竊效歌舞積思精切聽至終日不得食侍直貲服疏苦財且專事膏沐澡粉其費亡所愛

父臨爲成陽侯

飛燕外傳江都王孫女嫁江都中尉趙曼與馮萬金通
一產二女歸之萬金長曰宜主次曰合德皆冒姓趙萬
金死馮氏家敗飛燕娣弟流轉至長安與陽阿主家合
趙臨其里巷託附臨屢爲組文刺繡獻臨臨悅受之居
臨家稱臨女

乃立健仔爲皇后

西京雜記趙飛燕爲皇后其女弟在昭陽殿遣飛燕書
曰今日嘉辰賞姊懋膺洪冊謹上毳三十五條以陳蹈
躍之心飛燕外傳奏書于后曰天地交暢貴人姊及此
令吉光登正位爲先人休不堪喜豫謹奏上二
十六物
以賀

寵少衰

拾遺記帝嘗以三秋閑日與飛燕遊戲太液池以虬龍
雕飾如真象以夾雲舟而行以紫桂爲柂柂帝每憂輕
蕩以驚飛燕命佞飛之士以金鎖纜雲舟使佞飛于水
底引去每輕風時至飛燕殆以風飄颻帝以翠纓結飛
燕之裾游倦乃返飛燕後漸見疏帝怨恚曰妾微賤何
時復預纓裾之游

西京雜記趙后有寶琴曰鳳皇皆以
金玉隱起爲龍鳳螭鸞古賢列女之

象善爲歸風
送遠之操

而弟絕幸爲昭儀

西京雜記趙后體輕腰弱善行步進退女弟昭儀不能

及也但昭儀弱骨豐肌尤工笑語二人並色如紅玉爲
當時第一皆擅寵後宮

居昭陽舍

西京雜記昭陽殿織珠爲簾風至則鳴如珩佩之聲殿
上設九金龍皆銜九子金鈴五色流蘇帶以綠文紫綬
金銀花鑷每好風日幡旒光影照耀一殿鈴鑷之聲驚
動左右設木畫屏風文如蜘蛛絲縷玉几玉牀白象牙
簟綠熊席毛二尺餘人坐則沒膝其窗扉多是綠琉璃
椽桷皆刻作龍蛇縈其間鱗甲分明見者莫不兢慄匠
人丁緩李菊巧爲天下第一

卒皆無子

西京雜記慶安世年十五爲成帝侍郎善鼓琴能爲雙鳳離鸞之曲趙后悅之自上得出入御內絕見愛幸趙后自以無子常託以祈禱別開一室左右侍婢莫得至以駟車載輕薄少年爲女子服入後宮者日以十數與之淫通無時休息有瘦怠者輒差代之而卒無子

飛燕外傳

后所通宮奴燕赤鳳兼通昭儀

因失衣不能言

飛燕外傳帝病緩弱大醫萬方不能救求奇藥嘗得吞卹膠遺昭儀昭儀進帝一九一幸一夕昭儀醉進七九

帝昏夜擁昭儀居九成帳笑吃吃不絕抵明帝起御衣
陰精流輸不禁有頃絕倒

中宮學事史

周禮序官女史八人鄭云女史女奴曉書者詩傳云后
妃羣妾以禮御于君所史書其日月授之以環以進退
之生子月辰則以金環退之當御者以銀環進之著于
左手既御著于右手事無大小記以成法蔡質立宋皇后儀女史受
長樂太僕侯覽璽綬授婕妤仔魏書后妃傳女尚書女史
女賢人書史書女小書女視三品又飛燕外傳宣帝時
披香博士淖方成白髮教授宮
中號淖夫人則亦學事史之類六典彤史二人

對食

金史后妃傳凡諸妃位皆以侍女服男子冠號假廝兒毛奇齡西河詩話明制直房與司房宮人俱有伉儷謂之對食又謂之菜戶若強作伉儷者稱白浪子

陸下幸宮

漢官舊儀掖庭令晝漏未盡八刻廬監以茵次上僮仔以下至後庭訪白錄所錄所推當御見刻盡去簪珥蒙被入禁中五刻卽罷留女御長入扶以出御幸賜銀環令書得環數計月日無子罷廢不得復御按鄭箋妾御于君不當夕卽此所云盡五刻罷也又云諸妾夜行抱衾與牀帳待進御之次序疏引鄭志如今漢抱帳此卽

所云推當御見蒙被入也唐張泌妝樓記開元初宮人被進御者曰印選以綢繆記印于臂上文曰風月常新印畢漬以紅桂膏則水洗不退又攷文秉烈皇小識云記明莊烈帝事聖躬燕寢之所爲屋三間而不並列由第二間而後第三間其第二間貯大薰籠衾裯之屬凡召幸宮眷至第三間則盡卸衣裳裸體至第二間取衾裯被身乃進至第三間所謂抱衾與裯也卽中宮與東西兩宮赴召不敢不遵用此禮惟先后謂周皇后以曾同糟糠不肯赴召

緣綈方底

御覽八百十六漢書儀曰印綬盛以篋篋以綠綈白表赤裏

赫號

書玉篇幘幘赤紙也

額上有壯髮

釋名沐者髮下垂又髦冒也覆冒頭頸也說文髮髮至眉也詩曰統彼兩鬢按沐髮聲同卽壯髮也

涿沐觀

黃圖涿沐觀在上林苑

尾涎涎

集韻澁徒鼎切泚澁小水一曰波直貌類篇又堂練切
澁澁光直貌按此字從聲當爲延不當爲廷玉篇亦云
澁又徒見切好貌玉篇爲唐人所修其謬久矣經籍纂
詁引五行志及此傳並作澁則知善本仍作澁也

少爲上官太后才人

爾時伎人之號謝朓集有詠邯鄲才人嫁爲廝養卒婦
宋書后妃傳晉武帝置才人爵視千石

晉書惠帝母選入掖庭爲才人

六典云今上改置才人按太宗名武氏爲才人卽自昔
已有不始于開元

祝延

方言延永長也凡施于年者謂之延論衡解除篇令巫祝延以解土神

女爲平都公主

一統志平都故城今忠州酆都縣治

昭儀

新唐書后妃傳昭儀在四妃下居九嬪首然漢無妃號故昭儀最尊

臭聞數里

論衡死僞篇洛陽丞臨棺聞臭而死多藏食物腐臭猥發人不能堪未爲怪也

長安志咸陽縣有漢傳太后廢陵水經注曰在霸城西北王莽

奏毀其陵今其處積土猶高謂之增塹又謂之增阜

銜土投穿中

小宗伯卜葬兆甫窆注鄭大夫讀窆爲聲杜子春讀窆爲冢皆謂葬穿礦也今南陽名穿地爲窆聲如腐脆之脆惠士奇曰水經注引漢書穿中作窆中則窆讀爲穿信矣許叔重曰穿通也窆穿地也文義異同

有胄病

釋名胄省也如病者胄瘦據平帝紀太后詔云皇帝疾

一發氣輒上逆此蘇林肝厥所本一切經音義引釋名胄瘠也如病瘠瘦也

鄭注周禮云胄者猶人胄瘦也其第八卷引釋名胄瘠也作省非

中郎訪者

當云郎中謁者所謂灌謁者也本以郎中試補

賜皮弁素積

積志執事者冠皮弁衣緇麻衣皐領袖下素裳所謂皮弁素積

安漢公第宮

陳震曰宮字當屬下句乃大司徒馬宮耳注強解可發一笑

便時上林延壽門

後書楊震傳車駕行還便時太學章懷曰待吉時而後

入按楚詞吉日兮良辰注曰爲甲乙辰謂寅卯甄鸞注
數術紀遺曰藝經云捐悶者周公作也先本位以十二
時相從其文曰周有文章虎不如龍豕者何爲來入免
宮王孫出卜乃造黃鐘犬龍馬廐非類相從羊奔蛇穴
牛入雞籠玄女經曰諸欲娶婦嫁女必記初許嫁之日
以爲本其娶婦時慎毋令尅其許嫁日辰也尅日害男
尅辰害姑盡尅日辰爲不利一家假令甲子日許嫁庚
辛日納財皆爲尅日
戊巳納之
爲尅辰也又無令夫家之門傷婦年卽婦有咎假令
月乙未
日巳時天罡加巳婦年立辰從尅加之夫家門在子地
太一加之夫家門在丑勝先加之此並爲夫家門傷婦
年也謂夫家門上冠火神尅妻家門上金
神也若夫門立酉婦在東方來卽婦有咎又云凡娶婦

爲入頑嫁婦爲出頑從方入圓爲入頑從方出圓爲出頑又不欲所出入之神傷日辰按此傳旣待時又須上林處所郎按嫁娶經行事然究亦何益

婉嫫有節操

列女傳作婉淑徐鍇繫傳引作婉嫫說文嫫靜也方言嫫滯審也齊楚曰嫫玉篇嫫密也疾也靜也文選女史箴引漢書爲婉嫫曹大家注嫫深邃也廣韻嫫靜安恭又嫫婉嫫柔順兒說文玉篇無嫫則嫫嫫字同

祿飾

說文但云飾有缺文廣韻祿未笄冠者之首飾也與此

文義爲合

黃皇室主

周宣帝楊皇后入隋亦爲樂平公主

元后傳

與東平陵終氏爲怨

一統志東平陵故城在濟南府歷城縣東齊乘在濟南東七十五里周二十餘里鄭樵撰氏族畧誤斷東平遂以陵終氏爲複姓云見此傳其謬妄無耻可謂至矣

婉順得婦人道

西京雜記元后在家嘗有白燕銜白石大如卵墜后續

筐中后取之石自剖爲二其中有文曰母天地后乃合之遂復爲合如寶錄焉後爲皇后常并置璽笥中謂爲天璽

年十八矣

論衡骨相篇清河南宮大有與正君父稗君善者遇相君曰貴爲天下母是時宣帝世元帝爲太子稗君乃因魏郡都尉納之太子

旁長御

漢舊儀女御長如侍中

絳緣諸子

續志衾玄服皆絳緣光武紀更始諸將服婦人衣諸子
長子鳳嗣侯

西京雜記王鳳以五月五日生其父欲不舉曰俗謬舉
五日子長及戶則自害不則害其父母其叔父曰昔田
文以此日生其父曰勿舉其母竊舉之後爲孟嘗君號
其母爲薛公大家以古事推之非不祥也遂舉之

且羌胡尙殺首子

列子湯問越之東有輒休之國其長子生則鮮而食之
謂之宜弟墨翟節葬作
軻沐之國淮南主術齊桓公好味易牙烹
其首子而餌之

起土山漸臺

列女貞順傳燕昭王出遊留夫人漸臺之上辯通傳齊
宣王置酒漸臺則臨水之臺皆名漸臺不專起于漢宮
故此云王根作之黃圖云一說漸臺星名法星以爲臺
壤決高都連竟外杜

水經注沔水上承皇子陂于樊川西北流逕杜縣之杜
京西又北逕下杜城卽杜伯國又北逕長安城西與昆
明池水合又北流注渭亦謂是水爲潏水亦曰高都水
前漢之王氏五侯大治池宅引沔水入長安城故百姓
歌之云云按寰宇記長安志並云下杜城在長安縣南

一十五里民間侈言五家第宅相連亦不爲過又三輔

黃圖長安城南出東頭第一門曰覆盎門一號杜門其

南有下杜城漢書集注云水經注爲應劭語故杜陵之下聚落

也故曰下杜門然所云外杜當在於是師古不知高都

爲何水反借成都侯商事駁此壤決高都真可笑也杜朴

水經注作五杜五與鄂聲

同孟康所據亦爲近理

從上借明光宮

按黃圖桂宮有明光殿玉海引三秦記桂宮有明光殿皆金玉珠璣爲簾箔處處明月

晝夜光明殿以金爲凡玉爲階又明光宮武帝太初四年秋起在長樂

宮後南與長樂宮相連屬西都賦北彌明光而亘長樂西京賦屬長樂與明光徑北

通乎此當是成都侯商所借也甘泉宮亦有明光宮

輯濯越歌

說苑善說篇鄂君子皙乘青翰之舟越人擁楫而歌

赤墀青瑣

韓非十過篇殷人四壁堊墀張載魏都賦注丹墀以丹

與蔣離合用塗地也漢官舊儀黃門郎日暮入對青瑣

門拜名曰夕郎御覽

一百三十五

應邵漢官儀曰天子朱泥

殿上曰丹墀

立兩市

韓非篇齊桓公宮中二市女閭二百

春幸繭館

漢官舊儀皇后親桑于苑中蠶千簿以上羣臣妾從桑還獻于繭觀

遵霸水而祓除

周官女巫巫掌歲時祓釁浴鄭云如今三月上巳如水上之類續書禮儀志三月上巳官民皆于東流水上曰洗濯祓除去宿垢疾爲大絜謂之禊也

夏遊禘宿

寰宇記御宿川在萬年縣南三十七里

集黃山宮

黃圖豫中觀武帝造。在昆明池。亦曰昆明觀。元和志黃山宮在興平縣西南三十里。武帝微行西至黃山宮。

冬饗飲飛羽

黃圖未央宮有東明飛雨

寰宇記引黃圖同玉海作飛羽蓋據此書改

按西

都賦後宮則有鸞鸞飛翔之列。西京賦後宮則昭陽飛翔。字損又訛羽爲雨。

登長平館

黃圖長平觀在池陽宮臨涇水

傳國璽

按秦璽自光武受劉盆子降後其存亡本末惟玉璽記

冊府元龜所言爲足徵宋隋志通考皆有舛誤今次第出之而附以辨駁云吳志孫破虜傳注江表傳曰堅入浴軍城南甄官井上旦有五色氣舉軍驚怪堅令人入井探得漢傳國璽文曰受命于天旣壽永昌方圓四寸上紐交五龍上一角缺初黃門張讓等作亂勸天子出奔左右分散掌璽者以投井中又山陽公載記云袁術將僭號聞堅得傳國璽乃拘堅夫人而奪之後書徐璆傳袁術死軍破璆得其盜國璽及還許上之宋書禮志秦始皇藍田玉璽螭虎紐文曰受天之命皇帝壽昌高祖佩之與斬白蛇劍俱爲乘輿所寶晉懷帝沒胡傳國

璽沒于劉聰

御覽璽譜曰晉元帝東渡江歷數帝無玉璽北人皆云司馬家是白板天子

後

又屬石勒及石虎死胡亂晉穆帝代乃還天府

晉書穆帝紀與

服志璽文皆與宋志同蓋誤記背文

此傳國璽也

玉海八十四云晉有天

書與與服志以爲秦璽按其說不知何據

通鑑太元十九年慕容垂伐慕容

永永求救于雍州刺史都恢并獻玉璽一紐此卽隋代

謂之神璽也至梁末雍州璽爲北齊所得乃冒以爲傳

國璽故北齊書辛術傳云王僧辯破侯景術移鎮廣陵

獲傳國璽送鄴文宣以璽告于太廟此永昌歷宋齊梁

梁敗侯景得之景敗侍中趙思賢以璽投景南兖州刺

史郭元建送于術故術以進焉

通考卽以此事爲真不一攷玉璽記乃粗疏也

隋書禮儀志因云後齊六璽之外又有傳國璽白玉爲之方四寸鳥篆書文曰受天之命皇帝壽昌又云後周皇帝八璽有神璽有傳國璽皇帝負展則置神璽于筵前之右置傳國璽于筵前之左隋高祖卽位神璽寶而不用受命璽封禪則用之

按後周得傳國璽于齊亦只有七璽不知何從益此神璽

志不載高祖所改之由而託諸後周非也

歐陽修車服志又云天子有傳國

璽及八璽神璽以鎮中國藏而不用受命璽以封禪禮

神彼以爲傳國璽在八璽之外異于神璽受命二者是

不考隋志及唐六典只有八寶新史孟浪大抵如此

志云

貞觀十六年太宗刻玄璽其文曰皇天景命有德者昌六典不載玄璽蓋與寶冊同入昭陵

六典注

徐令言玉璽記曰傳國璽李斯所製回文曰受命于天

既壽永昌璽上隱起爲盤龍文文曰受天之命皇帝壽

昌方四寸紐五龍盤

以下同
宋志

石季龍摩其隱起之文又

刻其傍爲文曰天命石氏後冉閔敗其將蔣幹求救于

晉遂以璽送建業永和八年也

事詳晉書
謝尚傳

歷東晉宋齊

梁爲侯景所得景敗僞將侯子鑿盜璽走江東懼追兵

至投諸佛寺爲棲霞寺僧永得陳永定三年僧永使弟

子普智奉獻陳亡璽傳于隋又晉陽秋云晉孝武太元

十九年雍州刺史郗恢于慕容永處得璽乃送建業其

璽方六寸厚一寸七分高四寸六分蟠龍隱起文字巧

妙一與傳國璽同但形制高大玉色不逮耳自晉至梁相傳謂之鎮璽及侯景敗侍中趙思齊挾以渡江兗州刺史郭元建得之以送于齊文宣帝齊亡入周周傳于隋隋文帝初得之爲傳國璽開皇二年改爲受命璽至開皇九年平江南得真傳國璽及改前所得大者名神璽至大業初著之于令隋末又没于宇文化及竇建德武德四年克平東夏建德右僕射裴矩奉傳國璽及神璽六璽以獻按舊書竇建德傳建德敗左僕射齊善行右僕射裴矩行臺曹但及建德妻率僞官屬舉山東之地奉傳國璽來降又云建德破宇文化及謁蕭皇后稱臣隋義成公主先嫁突厥及是迎蕭皇后建德勒兵千餘騎送之入蕃則是入璽已歸建德未隨蕭后入突厥也元楊桓公云唐得傳國等璽于突厥

者此俗說之
訛不可信

冊府元龜

五百九十四

周廣順三年內司製國

寶兩座詔太常具制度以聞

太常所奏未詳盡

史臣曰秦李斯

取藍田之玉玉工孫壽刻之方四寸斯爲大篆書文之

形制爲魚龍鳳鳥之狀希世之寶也

下敘與玉璽記同

天祐四

年輝王傳位于梁命宰臣楊涉送寶于梁梁亡莊宗入

汴得之同光末內難作亂兵犯蹕寶爲火所灼文字訛

闕明宗清泰帝復得之清泰敗

潞王從珂

以傳國寶隨身自

焚而死其寶遂亡失其神寶者不知何代造東晉孝武

十九年郊恢送于金陵

下事與玉璽記同

隋文帝改號傳國璽

按俊齊已號傳國璽

又改爲受命璽仍以秦璽後出得于亡陳以

北朝所傳神璽爲第一秦璽次之唐高祖得之寶建德

妻唐末不知所在晉天福初晉高祖以傳國寶爲清泰

所焚

觀此則傳國璽非傳聞被焚實有灼壞之餘在也

特製寶寶一座開運末

契丹陷中原晉主奉表歸命于虜主遣皇子延煦等奉

國寶并命印三面送與虜主其國寶卽天福所造者也

太常奏其文曰皇帝神寶通考其文曰受天明命惟德允昌

延煦等廻虜主與晉帝

詔曰所進國寶非眞傳國寶其眞寶速進來晉主奏曰

眞傳國寶因清泰末僞主從珂以寶自焚自此亡失先

帝登極之初特製此寶左右臣寮備知不敢別有藏匿

也漢朝二帝未暇修製故太祖命有司特製此一寶焉

白玉方四寸螭虎紐其一宜以皇帝承天受命之寶其一宜以皇帝神寶爲文中書令馮道書寶此有司所奏

也按此記二璽存亡最顯矣攷陳書姚察傳察著玉璽

記當時服其該博

唐志儀注類姚察傳國璽十卷徐令言玉璽正錄一卷

蓋梁末

事皆察所聞見爲徐令言所本而冊府言唐末事亦其

耳目所覩接故比史志尤核也冊府云神寶不知何代

造者接晉書慕容儁載記云先是蔣幹以傳國璽送于

建鄴儁欲神其事業言歷運在已乃詐云冉閔妻得之

以獻賜號曰奉璽君建元曰元璽推儁既詐稱得璽理

須巧琢一相似者御覽

六百八十三

燕書曰元璽元年蔣幹

遣太子詹事劉猗賫傳國璽詣晉求救猗負璽行數里

天黃霧四塞不能進易取行璽始得進

行璽六此則偽璽之二

此則偽

史憑僞旨以明傳國璽實已所當得然則神璽固僞所造而慕容永因以獻晉也其他所見文同秦篆者紛紛不一後魏書太武紀太平真君七年鄴城毀五層佛圖于泥像中得玉璽二其文皆曰受命于天既壽永昌其一刻其旁曰魏所受漢傳國璽御覽又載石虎別傳曰武鄉長城縣民韓強在長城西山巖穴間得玉璽一方四寸厚二寸與秦璽同文虎以爲瑞此等所紀皆是僭竊之徒僞造以欺眾耳全唐文四百四十一寶泉述書賦自注曰至德中安史敗後四從弟詔于河陽清水渠下得

傳國璽其文曰受命于天既壽永昌點畫皆隱起作龍
鳥狀側文小篆曰魏所受漢傳國璽背上蟠螭一角折
鼻尖有黃疵瑕按泉所云則傳國璽又嘗落于安祿山
手也然神璽至唐末不知所在者冊府元龜又云帝王部二
一天祐十八年晉王不用偽梁年號魏州開元寺僧傳真獲傳國
寶一送于行臺傳真之師于廣明中遇京師喪亂得之
緘秘已四十年篆文古體人不識之惟以珍物秘藏非
以爲國璽也興建初法物司收市寶玉傳真將鬻之玉
人識而歎曰國寶之一也何至于斯傳真且喜送于行
臺帝出之以示諸將驗其文卽受命八字也光彩瑩耀

希世罕工羣僚諸將奉觴稱賀

五代史直云唐受命寶

按如其所

言豈卽神寶歟然莊宗後又不知此璽所在也宋史與

服志太祖受禪傳周二寶又製大宋受命之寶

太宗又別製承

天受命之寶是後諸帝嗣服皆別爲一寶以皇帝恭膺天命之寶爲文凡上尊號有司製玉寶則以所上尊號

爲文玉廣四寸九分厚十二分

仁宗皇祐五年作鎮國神寶

先是奉宸庫有良玉

廣凡厚半之仁宗以爲希代之寶不欲爲服玩因作是寶命宰臣龐籍篆文寶成太常禮院引唐六典次序曰

一神寶二受命寶

哲宗紹聖三年咸陽縣民段義得古玉印自

言于河南鄉劉銀村修舍掘地得之有光照室四年

通考

十二月十二上之詔禮部御史臺以下參驗元符元年三月翰

林學士承旨蔡京及講議官十三員奏按所獻玉璽色

綠如藍溫潤而澤其文曰受命于天既壽永昌其背螭

紐五盤紐間有小竅用以貫紐

又得玉螭一首白如膏亦溫潤其背亦螭紐五

盤紐間亦有貫紐小竅其面無文璽大小相合

篆文工作皆非近世所爲臣等

以歷代正史考之曰皇帝壽昌者晉璽也曰受命于天

者後魏璽也

隋志云齊因後魏制此通言車服之制也其後敘六璽外又有傳國璽乃齊時所得

不因後魏也羣小考史何其粗疎若有德者昌唐璽也以爲太武佛像中所得者益屬虛妄

貞觀惟德永昌石晉璽也則既壽永昌者秦璽可知今

得璽于咸陽其玉乃藍田之色其篆與李斯小篆體合

飾以龍鳳鳥魚乃蟲書鳥迹之法于今所傳古書莫可

比擬非漢以後所作明矣漢晉以來得寶鼎瑞物猶告

廟改元肆筵上壽況傳國之器乎其沿寶法物禮儀乞

下所屬施行

盃以金裝內設金牀暈錦褥飾以雜色玻璃碧石珊瑚金精石瑪瑙又盃二重皆裝

以金覆以紅羅繡靶載以腰輿及行馬並飾以金又有香爐寶子香匙灰匙火箸燭臺燭刀皆以金爲之是所謂綵寶

法物也

據京奏色綠如藍而隋志云白玉璽記亦言

白玉復云其玉乃藍田之色豈藍田專出綠玉乎晉穆

帝事史傳正文灼然其知而京以皇帝壽昌爲晉璽是

并未知秦璽有兩文也宋志又云崇寧五年做李斯蟲

魚篆作寶文方四寸有奇名爲鎮國寶大觀元年用元

豐中玉琢天子皇帝六璽初紹聖間得漢傳國璽無檢

幅又不缺

幅通考作螭

疑其一角缺者乃檢也帝于是取其

文而黜其璽不用自作受命寶合爲八寶

政和七年從于闐得大玉

踰二尺色如截肪又制一寶赤螭紐文曰範圍天地幽

贊神明保合太和萬壽無疆篆以魚蟲制作之工幾于

秦璽其寶九寸檢亦如之號是徽宗亦識其僞矣通考

曰定命寶合前八寶爲九

王禮百十五 寧宗嘉定十四年又得玉璽其文曰受命于天

既壽永昌又不知何時僞作也元史楊桓傳有得玉璽

于木華黎曾孫碩德家者桓辨其文曰受天之命既壽

永昌曰此歷代傳國璽也亡之久矣卽爲述璽始末

傳又云或得玉璽于故臣札刺氏之家其文曰受 暇耕

命于天既壽永昌成宗紀同一事而乖異如此

錄至元三十一年御史中丞崔彥進玉璽于皇太孫監

察御史楊桓爲箋曰臣桓讀之曰受命于天既壽永昌

宋齊梁陳相傳以至于隋隋滅蕭后與太子正道乃蕭后孫

齊王暕遺腹子并傳國璽並入突厥唐太宗卽位寶璽未獲乃

自刻玉曰皇天景命有德者昌按突厥滅在貞觀四年作玄璽在貞觀十六年

又貞觀四年蕭后與正道自突厥奉璽歸于唐朱溫篡

唐莊宗定亂璽入後唐至廢帝自焚璽不知所在至宋

哲宗咸陽民段義獻玉璽及徽宗爲金所虜凡有寶璽

皆取之內璽一十有四青玉傳國璽一卽段義所獻其色與

今所獻玉璽相同則知宋之南遷二百年無此寶璽也

自金旣取于宋寶璽出處得失未明以及我元太孫寶

命所歸應期而出又圖中別有璽謂玉其文亦八旁注

曰此傳國寶背文也

與玉璽記合此爲真秦璽

今見寶璽之背皆刻

螭形蟠屈凹凸不齊無地可置此文按太平御覽泰元

十九年雍■刺史郗恢表慕容永稱藩奉璽方六寸厚

一寸七分蟠螭爲鼻今璽高四寸六分四邊龜文以斯

言之當別是一璽非今傳國璽也按由楊桓言推之則

元所得者玉非純白螭背無文旣非秦璽方餘四寸四

邊非龍文又殊神璽攷徽宗所刻受命璽正用秦文方

亦四寸彼所見者正是大觀年物耳何乃詫爲秦璽乎

薛尙功鍾鼎欵識兩摹其文云一璽本只一器緣傳摹

字畫不同故形制大小有異此卽秦璽正面背上兩文

也尙功在宋時猶曉古制故其言不爽至輟耕錄所載謂秦璽尙存其識別亦不難舊唐職官志云天后惡璽字改爲寶其受命傳國等八璽並改雕寶字神龍初復符寶郎爲符璽郎開元初又改爲符璽從璽文也然則所云神璽受命璽其旁有欵識阿武改鑄之迹不可掩也同光被灼之文又不能補也苟無此二癥依然新好者其贗無疑楊桓在元頗名小學彼旣謬指雅俗並信明太祖猶心艷故順帝北遁後命將討伐有三事一爲傳國璽未獲也明史輿服志弘治十三年鄆縣民毛志學于泥河濱得玉璽文曰受命于天旣壽永昌色白微

青螭紐陝西巡撫熊翀以爲秦璽復出遣人送之禮部
尙書傅瀚言自有秦璽以來歷代得喪眞僞之跡具載
史籍今所進篆文與輟耕錄等書摹載魚鳥篆文不同
其螭紐又與史傳所紀文盤五龍螭缺一角旁刻魏錄
者不類蓋秦璽亡已今所進與宋元所得疑皆後世摹
秦璽而刻之者竊惟璽之用以識文書防詐僞非以爲
寶玩也自秦始皇得藍田玉以爲璽漢以後傳用之自
是巧爭力取謂得此足以受命而不知受命以德不以
璽也故求之不得則僞造以欺人得之則君臣色喜以
夸示于天下是皆詭笑千載我高皇帝自制一代之璽

爲受命之符而垂法萬世何藉此璽哉帝從其言卻而

不用

程紹傳天啟四年巡撫河南臨漳民耕地漳濱得玉璽龍紐龜形方四寸厚三寸文與秦璽同紹聞

之手朝畧言秦璽不足徵久矣今璽出適在臣疆既不當復埋地下又不私秘人間欲遣官恭進闕廷跡涉貢媼至尊所寶在德不在璽一代名賢如鄒元標馮從吾等皆憂國奉公願陛下惟賢是寶區區秦璽之眞僞又安足計哉是二人所言大臣之節固遺于蔡京楊桓輩也

投之地

玉璽記元后出璽投地璽上螭一角缺

後書曹皇后紀魏受禪遣使求

璽緩后怒不與如此數輩后乃呼使者入親數讓之以璽抵軒下因涕泣橫流曰天不祚爾與元后事亦相類

至漢家正臘日

通典高堂隆議王者各以其行之盛而祖以其終而獵

火始于寅盛于午終於戌故火行之君以午祖以戌臘
後書陳寵傳其祖咸于王莽時猶用
漢家祖臘曰我先人豈知王氏臘乎
宋祝穆事文類聚
國朝用漢臘蓋冬至後第三戌大墓日也是爲臘古法
遇閏歲卽以第四戌爲臘不可在十一月也
引叢語

漢書疏證卷三十五終

浙江書局刊

許碩儒校

吳鴻望校

高倍森校